

علوم اقتصادیه واجتماعیه

مجموعه گار

هر آیک برنجی کونی نشر اولتور

مؤسساری

احمد شعیب ، رضا نوری ، محمد هاریر

مندرجات

علوم اجتماعیه: بدیع نوری. — ۱۳۲۷ سنه-بی اسباب
موجبه لایحه سی مایعد وختام: محمد جاوید. — تحولات
فکریه: بدیع نوری. — آوروپا مراکز مدنیه-سنده اجرا
ایدیل تدقیقات نتایجی مبین دیوان محاسبانه تقدیم اولونان
راپورلر: حسن نحسین.

مدیر وصاحب امتیازی:

محمد هاریر

نسخه سی: ۱۰ غروش

استانبول

امور اداره ونشریه: طنین مطبعه سی.

۱۳۲۷

برلینده اجرا ایدیلان تدقیقات نتایجی مین راپوردر

دیوانه محاسباتک تاریخیه سی

المانیا ایمپراطورلغی تشکیل ایدن برطاقم حکوماتک دائره استقلالیتاری داخنده اوله رق استیفا وایفا ایتدکاری تکالیف و مصارفاتک حساباتی تدقیق وظیفه سیله مکلف برر دیوان محاسباتاری وار ایسه ده بعض اوافق حکومتلرده بوکا دیوان محاسبات عنوانی ویرلمه رک قونطرول هیئت نامی اعطا ایدلمکده در. هیئت اتحادیه نک تشکلی متعاقب تعیین ایدیلان واردات و مصارفات مشترکه نک تدقیق و تقیش حساباتی ایچون ده ایمپراطورلق دیوان محاسباتی نامیله «پوتسدام» ده بر دیوان محاسبات تشکیل ایدلمشدر. یالکز باویرا حکومتک مصارف عسکریه سی مقاوله مخصوصه سی ایجابجه کندی دیوان محاسباتی طرفندن تدقیق ایدلمکده در.

ایمپراطورلق دیوان محاسباتک وظیفه و صلاحیتی و صورت تشکلی پروسیه دیوان محاسباته مشابه ایسه ده یقین زمانلره کلنجیه قدر تشکلی حقنده قانون مخصوص موجود بولنماقده ایدی. هر نه قدر حکومتجه ایمپراطورلق دیوان محاسباتی ایچون پروسیه دیوان محاسباتی اساسی دائره سنده بش دفعه لایحه قانونیه تکلیف ایدلمش ایسه ده رایخشتاغ مجلس ملیسی پروسیه نک اسکی قانوننه توفیقاً ایمپراطورلقده بر دیوان محاسبات تشکیلاتی موافق بوله میهرق دیوان محاسباتک طوغریدن طوغریه مجلس ملییه مربوط اوله جق برطرزده تشکلی رأی و فکرنده بولندیقندن و حکومت ایسه بوفکره اشتراک ایتدیکندن ناشی ۱۹۱۰ سنه سی مارتنه قدر قانوننر اوله رق ایفای وظیفه ایتش و ۲۱ مارت سنه ۱۹۱۰ تاریخنده حکمی

یش سنه جاری اولق اوزره موقت بر قانون اصدار ایدلمشدر .
 پروسیه ده حساباتک ایلك تفتیش و تدقیق ۱۷۰۱ سنه سنده باشلامشدر .
 ۱۷۱۴ سنه سنده محاسبات عمومی اوطه‌سی تأسیس ایدلمش و بیوک فرهدریق
 زماننده بو تفتیش هیئت اراضی دائره‌سی ، حربیه دائره‌سی کی بر طاقم
 ناملر المشدر . بیوک فرهدریق زماننده دیوان محاسبات حکومت مطلقه‌نک
 بر قونطورول دائره‌سی و مونارشپینک قوتلی بر استنادکاهی ایدی . بیوک
 فرهدریق « ۱۷۴۰ - ۱۷۸۶ » مدت حکومتی زماننده انجق اک مدھش
 مستبدلرک قوللانابله جکی الفاظ ایله دیوان محاسباته دهشتلی امرلر
 کوندرمشدر .

بو امرلرده بتون نظارک ، اک بیوکنندن اک کوچکنه قدر بتون
 مأمورین مالیه‌نک ظایت صیق بر تفتیش آلتده بولندیرلمسی بیوک بر غضب
 ایله طلب ایتمشدر . بوامرنامه‌لر بو کونکی اصول تراکتپورانه دن پک
 اوزاقدر . بیوک فرهدریق دیوان محاسباتله اوغراشمسی اک مشهور
 اجرا آتندن در . حتی بر آره‌لق باشلایان بر مجلسک روزنامه مذاکراتنک
 اکالندن اول تعطیل ایدیله‌میه جکی حقنده ینه اوشدتلی افاده‌سیله بر امر
 اسطار ایتمش ایدی . بونک نتیجه‌سی اوله‌رق بعضاً کیجه کیچ وقته
 قالدینی حالده مذاکراتک ختامی احتمالی اولدینی حکمداره عرض
 ایدلمش و هیئتک آج قالدق‌لری بیلدیرلمش اولسی اوزرینه بیوک فرهدریق
 مطبخندن یمک کوندرمشدر . دیوان محاسبات بولطفی سوء استعمال
 درجه‌لرینه واردیردینی حالده حکمدار بونی دائماً نشئه و سرور ایله قبول
 ایتمش و دیوانک بوسوء استعمالنه هر وقت الدامشدر .

المانیا ایمپراطورانی دیوان محاسباتی اسکی شمالی هیئت متحده زماننده
 یعنی ۱۸۶۸ سنه سنده پروسیه دیوان محاسباتنک بر شعبه‌سی اولق اوزره
 تأسیس ایتمشدی . انجق پروسیه دیوان محاسباتی ۱۸۷۲ سنه سنه کلنجیه

قدر یالکز حکمدارک ویردیکی اوامرایله حرکت ایدر ایدی. ناپولیونک استیلا سندن یعنی ۱۸۱۷ سنه سندن صکره اجرا ایدی لان اصلاحتی متعاقب دیوانک تنسیقی ایچون بعض تشبثات وقوع بولش و دیوان محاسبات حقنده ۱۸۲۴ سنه سنده بر نظامنامه نشر ایدلشدی. انجق اک صوک شکلی ۱۸۷۲ تاریخی قانون ایله ویرلشدر. ایمپراطورلغک اعلانندن صکره بونک دیوان محاسباتی دخی ۱۸۷۲ تاریخی سالف الذکر قانونه توفیقاً تشکیل ایدلشدر.

«وضعیتی»

دیوان محاسبات مستقل برداردر. ویالکز باش وکیله مربوطدر قوه اجرائیه ایله اولان مناسبتی نظارتلر محاسبه سندن و ولایات تأدیه مأمورلردن الدینی حسابلری تدقیق و حساب قطعی ایله تطبیقدن عبارتدر. ایفای وظیفه ائناسنده حساب ویرن مأمورلردن تحریراً استیضاحات دخی اجرا ایدیهیلور. دیوان محاسباتک محکمه صفتی یوقدر. انجق خلاف قانون صرفه مطلع اولدینی مبالغک استردادی حقنده ویره چکی قرارلر بر مسئله حقوقیه تشکیل ایدر و قانوناً معین اولان احوال داره سنده حل اولنور مثلاً خرجراه و تقاعد معاشاتی مسائلی محکمه لرحه حل اولنور یعنی بر مأمورک فضلّه خرجراه الدیغنی دیوان ادعا ایتدیکی حالده مأمور دخی اشبو خرجراهی المغه حق اولدیغنی ادعا ایلر و دیوانجه استردادینه قرار ویریلان پاره یی اعاده دن امتناع ایدر سه علاقه دار اولان نظارتک محکمه یه مراجعت ایتسی لازمکلور.

حکمدار ایله اولان مناسباتی ایسه بوجه آتیدر : ۱۸۷۲ تاریخی پروسیه دیوان محاسباتی قانونک یکرمنجی ماده سی موجبجه ایمپراطورلق دیوان محاسباتی نتیجه تدقیقات و مشهوراتی مین اوله رق سنه نهایتده

حکمداره بر راپور ویرر . بو راپورده بوجه آتی نقاط اساسیه دن بحث اولنور . اولاً راینخشتاغه حساب قطعی نتیجه‌سنده دیوان طرفندن ویریلان مطالعه‌نامه‌ده محرر خصوصات اساسیه ، ثانیاً دیوانك اداره داخلیه‌سی و کوردیکی ایشلر حقنده ایستاتستیک قیلندن معلومات « دیوان امور داخلیه‌سی حقنده اسکیدن برو پروسیه حکمدارینه نصل راپور ویرور ایسه شمیدی‌ده اواصول محافظه‌ایدیلهرک ایمپراطوره بیان معلومات ایدل‌دیکندن بوجهت راینخشتاغه بیلدیرلر » ، ثالثاً بتون ایمپراطورلغه متعلق مسائل مالیه حقنده حلی ایجاب ایدن مواد اوزرینه جریان ایدن مخبرات و مذاکرات نتایجی ، رابعاً بتون ایمپراطورلق مأمورلرینه ویریلان خانه ایجاری مسائلی حقنده کوریلان لزوم اوزرینه مناسب عدایتدیکی نظریه‌لر ، خامساً موجود اولان نظاماتك ایضاح و تعدیلی حقنده ایمپراطوره وصایای مناسبه‌ده بولنق « چونکه ایمپراطورك رأساً قانون تکلیفنه صلاحیتی واردر » ، سادساً قانون شکننده اولیه‌رق یکیدن وضعی لازمکلان قواعد اساسیه‌نك تثبیتی ، سابعاً قوانینك احضار و تنظیمنده و نظامات اداریه‌نك تطبیقنده حکومتله بشریک مساعی ایتمک کبی بعض نقاط اساسیه حقنده حکمداری ، عادتاً ارشاد ، ثامناً تصرف ممکن اولان احوالک کافه‌سی تصریح « بو تصرف جهتلری علاقه‌دار اولان ناظرلره دیوانجه بالطبع تبلیغ اولماز » ، ثامناً دیوان محاسباتك مساعیسی نتیجه‌سی اوله‌رق فضله صرفندن طولایی استردادلی لزومی تحقق ایدن مبالغ ایله استحقاقندن نقصان ویریلوب تأدییه‌سی لزومی تبین ایدن مبالغ حقنده معلومات اعطاسی « مثلاً صوگ ویریلن ۱۹۰۷ سنه‌سی راپورنده بر میلیون مارق استردادینه و یوزاللی بیك مارق راده‌سنده برپاره‌نك یکیدن اعطاسنه قرار ویرلدیکی ذکر ایدلمشدر . مع هذا بوجهتک حکمداره ویریلان راپورده ذکرندن بعدما صرف نظر ایدلمشدر . »

اشبو سنوی راپورده جداً مهم اولان شیلر موضوع بحث ایدیلهرک

اوافق مفردات ایله املای ستون جائز دکلدر . وبواحوال دائره دائره
 وبراصول دائره سنده ذکر اولتور . دیوانی تشکیل ایدن ده پارتمانلردن
 هربری مشاهدات و تدقیقاتی حقیقه برر راپور حاضرلارلر . وبو راپورک
 اوزرینه ایمپراطوره عرضی لازم کلان مواددر دیه یازارلر . ده پارتمانلرک
 بوراپوری عادتاً رئیس ثانی وظیفه سی ایفاییدن دیگر بر ده پارتمان مدیرینه
 « موسیو فون لایپ » وریلور . اوده کندی مشاهداتی علاوه صورتیه
 بونلری مزج ایدر وبو صورتله ویرلسی مقتضی راپور میدانه
 کلیر . بو راپورک مسوده سی یالکیز دیرکتورلر طرفندن امضا
 اولتور . بیاض ایسه بتون هیئت طرفندن امضا ایدلک ایجاب ایدر .
 راپور پوسته ایله بلا واسطه حکمداره ارسال اولتور . باش وکالتک
 بوراپور مندرجاتندن معلوماتی یوقدر . حتی بوندن اون ایکی سنه اول
 باش وکالتده بولنان « قونت قاپریوی » ایمپراطوره ویریلان راپورک
 صورتی دیواندن ایستدیکی حالده دیوان هان طلب واقعی رد ایتش
 ولزم ایسه ایمپراطوردن طلب ایدلسی یولنده جواب ویرمشدر .
 بوراپورک ایمپراطور طرفندن تدقیق و مطالعه ایدلدیکی آثارینک کوراسیله
 ثابتدر مثلاً پوسته اداره سنک برحقو یرلرده پک مزین پوسته بنالری
 انشا ایتدیردیکی دیوانجه اکلاشیله رق و حکومتک احتیاجاتنه نظراً بومزین
 بنالرک فضله بردبدیه اولدینی کوریلهرک بوجهت راپورده ذکر ایدلمش
 ایدی . حکمدار کرک پوسته مدیر عومیسنه وکرک دیگر دواژه طوغریدن
 طوغری به سرایندن برامر اصمدار ایله بردها بوقیل شیلر یاپلماسنی
 وشاید بویه لزومسز شیلر یاپلدینی بردها دیوان محاسباتجه بیلدیریلورسه
 کندولرینک مسئول ایدیله جکنی اخطار ایتمشدر دیوان محاسبات سنوی
 ویرمهک مجبور اولدینی اشبو راپوردن ماعدا بعض احوال ایجاب ایتدیکی
 زمان حکمداره راپور ویرمهک صلاحیتداردر . بواحوال شوکی شیلردر:
 برداثره نک احوال مالیه سی نظر دقتی جالب برشکل آلوده مطبوعاتک

و مجلس ملینك مؤاخذاتنه سبب اولور ایسه و دیوانك تدقیقاتی ده اشبو مؤاخذاته حق و یردیره جك برشکل کسب ایدرسه حکمداره ثواب عد اولئان نقطه نظرک بیلدیرلسی دیوانك جمله وظايفندندر. چونکه دیوان محاسبات امور مالیه ده حکمدارک اساساً براسناد کاهی کیدر. دوائر مأمورینی هرکون تبدیل ایده بیلور. دیوان هیئت ایسه لاینغزلدیر. حکمدار مأمورینی ایجابنده تبدل ایچون دیوانك مطالعات و ارشاداته عادتاً محتاجدر. قوه تشریعی « رایشستاغ » ایله مناسبتی و مخابره یه صلاحیتی یوقدر حتی برحسابک مدافعه سی ضمیمه باش وکیل طرفدن تلقی ایتدیکی امر اوزرینه دیوان محاسبات دیرکتورلرندن « موسیو فوولایب » برکون رایشستاغک بودجه قومیسینونه کیتش ایسه ده بوقومیسینونده بولنسی هانکی قانونه تماس ایتدیکی کندوسنجه مجهول ومع هذا حتی اولیان بوشرفه مظهریتی شایان افتحار اولدیغنی افاده ایتسی اوزرینه رایشستاغچه بوکی موادده دیوان دیرکتورلرینک رایشستاغده مدافعات و ایضاحات ده بولنسی ایچون برقانون مخصوص تنظیمی حکومتک ایسه کرک حکومت کرک دیوان محاسبات، دیوانك مجلس ملینك نفوذ و حاکمیتی آلتیه کیرمسنه و مجلس ملی یه قارشو کندوسنی مسئول برموقعه القا ایتسنه موافقت ایتماشدر.

دیوان محاسبات حساب قطعی اوزرینه یازدیغی لایحه و مطالعه نامه یی باش وکیل معرفتیه مجلس ملی یه کوندر.

موقع تشریفاتسنه کلهجه : دیوان رئیس نظاردن صکره اخذ موقع ایدرو « Excellence » رتبه سنی حائزدر. رتب شخصییه موجود اولدیغندن مستخدمین سائر درجه لرینه کوره اخذ موقع ایدرلر.

« تشکیلات »

امپراطورلق دیوان محاسباتنده بررئیس واردر « بوررئیس پروسیه

دیوان محاسباتك رئیسیدر . ایماطورلق دیوانی الیوم درت دائره اولوب هریری برر مدیر « Directeur » ایله اداره اولنور . بوندن ماعدا مشاور « Conseiller » عنوانی حائر اون بش شعبه رئیسیدر واردر . مشاورلردن اوچ ویادردی بر مدیر معیتنه مأموردر . بونلردن ماعدا یوز اوتوز میز ومسجل واردر که سکرز اونر اوله رق مشاورلرک معیتنه مستخدمدرلر . دیوان بر هیئت مشاوره اولدیغندن رئیسک ریاستی تحتند مدیرلر و مشاورلر عقد اجتماع ایدرلر و ویریله جک قرارلرک اوراقی رئیس امضا ایدر . تسای « آرا وقوعنده رئیسک رأی ترجیح اولنور . رئیس باشلی باشنه ایش کوره مز . امورک تمشیقی ولایم کلان اوامرک اعطاسی مدیرلر عائددر . بومدیرلر کندی دائره لرینه عائد خصوصاتده دیوان نامنه اوراقه وضع امضا ایدرلر . بوندن ماعدا سکرز کاتب براداره مأموری وبرماکنه جی ایله اون خدمه موجوددر .

رئیس اولک معاشی سنوی ۲۵۰۰۰ مارقدن عبارت اولوب بونک ۲۱۰۰۰ مارق پروسیه دن و ۴۰۰۰ مارقده ایماطورلقدن ویرلمکده و ۸۰۰۰ مارق دخی خانه کیراسی المقدهدر . مدیرلرک معاشی سنوی ۱۴۰۰۰ مارق اولوب ۴۰۰۰ - ۵۰۰۰ مارقده خانه کیراسی المقدهدرلر . مشاورلرک معاشی قدماترینه کوره ۸۰۰۰ - ۱۲۰۰۰ مارق اولوب بونلرده ۴۰۰۰ - ۵۰۰۰ مارق قدر خانه کیراسی آلیورلر . میز ومسجللرک معاشی ۳۰۰۰ - ۶۶۰۰ مارق اولوب « معاشک حد ظایه سنه اون سکرز سنه خدمت دولته بونلردن صکره نائل اولورلر » بوناره سنه ده ۹۲۰ مارق خانه کیراسی ویرلمکدهدر .

دیوان مأموریتندن رئیسیدر دیرکتورلر ایله مشاورلر قید حیات شرطیله تعیین اولنورلر و تحدید سنه تابع دکلدرلر . میز ومسجللر ایسه بویله دکلدر . پروسیه دیوان محاسباتی رئیس حکمدار طرفندن تعیین اولنور . دیرکتورلر ایله مشاورلر رئیسک تکلیفی و « بوندسرات » لک و ایماطورلرک

تصدیق ایله تعیین اولنورلر . میز و مسجللر دخی طوغریجه رئیس طرفندن انتخاب و تعیین اولنورلر .

دیوان محاسباتک محکمه صفی اولمدینی ایچون نزدنده بالطبع مدعی عمومیسی یوقدر .

« وظائفی »

ایمپراطورلق دیوان محاسباتک باشلیجه ایکی وظیفه‌سی واردر: بری آتیده محرر مشترک دواړك حساباتی تدقیق و تفتیش ایکنجیسی ده قانون اساسی احکامنجه کندوسنه توجه ایدن وظیفه‌ی ایضا ایتمکدر . المانیاده قبل‌الصرف ویزه معامله‌سی یوقدر .

برنجی وظیفه‌سی : مجلس اتحاد « بوندسرات ، آلساس لورن ایالتی ، باش وکالت دائره‌سی ، خارجییه نظارتی ، داخلییه نظارتی « امور اجتماعیه ایله اشتغال ایدن بونظارت باشلیجه ایستاتستیک ، صحیه ، زراعت واورمان ، بانئت ، حکومت سیغورطه‌سی ، خصوصی سیغورطه شرکتلری تفتیشی ایمپراطور ویلهلم قتالی مدیریتلری جامعدر « حربیه نظارتی ، ایمپراطورلق محکمه عسکریسی « محاکم عسکریه‌نک تمیزی دیمکدر ، « دائره بحریه ، مشترک امور عدلیه و محکمه تمیز ، مالیه نظارتی ، مستملکات اداره مرکزیه‌سی « مستملکاتک هربری برحکومت مستقله کی اداره اولنورلر بودجه‌لری ده آریدر و حساباتک تفتیشی وظیفه‌سی محللرینه عاندر انحق عمومیه عانده بعض مصالح ایچون مستملکات اداره مرکزیه‌سی حائز صلاحیتدر . ایمپراطورلق شمندوفرلری ، ایمپراطورلق دیون عمومیه اداره‌سی ، مشترک دیوان محاسبات ، فوق النظام عسکری تقاعد وایتام وارامل معاشاتی « شمدییه قدر بوقسم معاشات فرانسه‌دن النان تضمینات حربیه‌نک تفریق اولنان برقسمندن تسویه ایدلمکده ایدی فقط بوباره

تماماً صرف ایدلش اولدیغندن شمدی بودجهیه ادخالنه مجبوریت حاصل اولمشدر ، پوسته وتلخراف ، ایمراطورلق مطبعه سیله بانقه سی ، رسومات دواثری حساباتی تدقیق وتفتیش ایتمکدر .

حسابات مذکور نك واردات قسمنی اوراق مثبته سیله تطبیق ایتمز . بوجهتک تفتیشی مفتشلره وتدقیقاتی دائره عائدنه محول اولوب دیوان محاسباتک بو خصوصده کی وظیفه سی مفتشلرک اجرا آتی قونطرول ایتمکدن عبارتدر .

معاشات ومصارفاندن معاشات ایچون اصحاب استحقاقک سنداتی شمدی به قدر جلب وتدقیق اولتمقده ایدیه ده بک چوق مشکلائی داعی اولدیغندن بعدما (۲۱ مارت ۱۹۱۰) امضاسز جدولک تطبیق ایله اکتفا اولنسی تقرر ایتمشدر . انجق وزنه لر معاشاتک حین تأدیه سنده اصحابندن مقبوض سندی المق ویا بر بوردرویه امضا ایتدیرمک خصوصلرنده محیر اولوب تأدیاتی ایچون بعدما کندی طرفندن یاپدینی برجدولی دیوانه کوندره جکدر . معاشات کی مقنن ومعین اولان وهرزمان عین مقدارده تکرر ایدن بعض مصارفات اوراق مثبته سی ده کتیردیلوب هر دوسیه دن لاعلی التعین برقاچنک کورلسی ایله اکتفا اولنور . فقط سابقه نسبتله معاشاتده وقوعبولان فرقلر حقنده آریجه مخطرهلر ایسته نیلور چونکه مأمورینک مقداری ومعاشلرینک یکونی قانوناً معین ومحدود اولدیغندن بو یکونک تبدیلی موجب اولان احوال بالخاصه جالب دقتدر . مأمورین معاشاتک تناقص ایتسی انجق اسکی بر مأموریرینه یکیدن بر مأمور استخدای تقدیرنده اولور چونکه مأمورین قدملری نسبتنده ضم معاشه نائل اولدقلرندن بر وظیفه یی ایفا ایدن بر مأمورک انفصالی تقدیرنده یرینه انه جق مأموره اومقدار معاش ویرلیه نیلور . انک ایچون سابقه نسبتله اولان تبدلات علی الاکثر ضم صورتنده در . اشبو ضمائمک اوراق مثبته سی ده بالاده عرض اولنان مخطرهلردر . یالکز بونوع اوراقدن

سنه‌نك برمدتنه منحصر اولان قسمی یكان یكان باقیلور. مفرداتی کثیر ومقداری مقنن اولان مصارفات اوراق مثبته‌سی ده دیوانك نظر تدقیقندن کچمز. مثال اولق اوزره شونی ذکر ایدم: برای تعلیم تحت سلاحه النان عسا کر ردیفه‌نك عائله‌لرینی انفاق ایچون حد اعظمی اوله‌رق بهر عائله‌یه شهری ویریلان التمش مارق داخلیه نظارتی تخصیصاتندن محالری مأمورلری معرفتیه بالتوزیع تنظیم اولنان بوردرولر داخلیه نظارتیه کونذیلور ایدی. دیوان برسنه بوردرولرک جاب وتدقیقنه توسل ایدم‌رک مفرداتی کثیر اولان بوتادیاتک انجق بر کره کوزدن کچرلمسی ایچون بالعموم دیوان محاسبات میزلی ۱۱۰ کون مشغول اولمشلردر. بوتدقیقندن بر فائده استحصال ایدلمدیکی کی تحت سلاحه النان عسکرک مقداری معلوم بولمنه مبنی بونده برکونا سوء استعمالات وقوعی ده تصور ایدیه مدیکندن آرتق بو کی اوراقک جلب وتدقیقندن صرف نظر اولنمشدر.

بوندن ماعدا مصارف اوراقی « انشا آت ، تعمیرات ، مهمات حربیه مایعاتی ، قشله واستحکام وشمندوفر انشا آتی » مناقصه قائمه ومقاوله نامه‌سی ایله متعادلر سنداتی وهیئت فنیه راپورندن عبارت اوله‌رق تدقیق اولنق اوزره کاملاً دیوان محاسباته جلب اولنمقده در. بو کی مصارفاتک ایفاسنده حکومتجه قاعده تصرفه رعایت ایدیلوب ایدلمدیکنک دخی تدقیق دیوان محاسباتک جمله وظائف اساسیه سندندر. حتی صوک زمانلرده یایله‌جق اولان شمندوفرلرک انشا آت مقاوله نامه‌سی اولاً دیوان محاسباته کوندریلوب رأی ومطالعاه‌سنک النمی راینخشتاغک تنسیبی اوزرینه تقرر ایتمشدر. بوقرار دائره‌سنده مستملکاتک بریسنده انشاسی قرارگیر اولان تیمور یولنه عائد مقاوله نامه اوزرینه دیوان محاسباتک سرد ایتدیکی مطالعات دائره‌سنده انشا اولنمندن طولانی بر خیلی تصرف وقوعه کلدیکی تحقق ایتمشدر.

دیوان محاسبات یالکز مصرف اوراق مثبته‌سی تدقیق ایتدیکی جهته‌

بونلردن ابراز اولنه میسانلرک متعلق اولدینی مصرف قبول اولنق ایچون
نسخه ثانیه سی طلب اولنور. انجق پاره نك مصرف یازلش اولسنه رغماً
صاحب استحقاقه ویرلیدیکی نسخه ثانیه سنك ابراز اولنه مامسیله
ا کلاشیلورسه بالطبع سوء استعمال دیمك اوله جغندن مأموری محکمه یه
سوق اولنور. والحاصل علی العموم اوراق مثبتہ نسق واحد اوزره اولیوب
مختلف شعبات اداره یه عائد نظامنامه لرده مصرفك وقوعنی مثبت نه کی
اوراق تنظیم و بونلردن هانکیلرینك دیوانه تقدیم اولنه جنی مصرف حد،
فقط براز اول عرض ایدلیدیکی وجهله دیوان بواوراقك کافه سنی یکان
یکان تدقیق ایتوب کندنجه حصول قناعته کافی کوردیدیکی بعض ورقه لر
ایله اکتفا ایتکده در.

دیوان محاسباتك ایکنجی وظیفه سنه کلنجه : کرک قانون اساسی یه
کرک قانون اساسی یه مربوط عد ایدیله بیله جك اولان سائر قوانین مالییه
مغایر کوردیدیکی کافه نقاطی پارلامنتویه بیلدیرمه مجبوردر. دیوان محاسبات
حساباتك تدقیق صره سنده کرک بودجه نك صورت تنظیمنده کرک
مصارفك صورت اجرا سنده بعض تقایص کوره بیلور، انجق بودجه نك
تنظیمی دیوانك وظیفه سی داخلنده اولدینی کی بوخصوصده پارلامنتونك ده
علی الا کثر یا کلدینی کوردیکندن و دیوانك تأسیسنده کی مقصد قانونی یی
بشقه صورته تأمین ده ممکن اوله مدیغندن کرک بودجه نك تنظیمنده کرک
مصارفك اجرا سنده دیوانك نفوذنی تأمین یولی بولنمشدر شویله که :
دیوانك حساب قطعی تدقیقاتی مین اوله رق پارلامنتویه ویریدیکی راپور
یا لکتر او حسابه متعلق اوله رق بونك خارجنده بودجه نك شکل تنظیمنه
دائر بیان مطالعه یه حتی یوق ایسه ده بر قاج سنه دنبرو حسابه متعلق
مطالعات و ملاحظاتی در میان ایتمکه اکتفا ایتیره کرک بواوروره برده مدخل
علاوه ایتکده در. اشبو مدخلده بعض دوائر بودجه لری و مثلاً مستملکات
بودجه سی برسنه، برشکلده دیگر سنه بشقه برشکلده تنظیم ایدلیدیکی و بونك

ایسه تدقیق حساباتی اشکال و مقایسه یی تضعیب ایتمکده بولندینی و موضوع بحث اولان مستملکات بودجه سنده احتیاط اچمه سی نامیله بر فصل کوریه رنک خزینئه دولت طور رکن مجلس ملینک بویله احتیاط اچمه سنک وجودینه و بودجه ده ارائه سنه جواز ویرمسی حسیله دیوان بونی مجبوراً قبول ایتمش ایسه ده آتیا بوکا میدان ویرلامسی مطالعه سی درمیان ایدلمشدر. بومطالعه نک اثری اوله رق مجلس ملیجه مذکور احتیاط اچمه سی فصلی قالدیرلش وپاره ده خزینیه تسلیم ایدلمشدر. ایسته بو طرزده کی مطالعاتدن مستملکاتده اجرا ایدیلان سائر برحقو سؤ استعمالنک اوکی النمشدر.

دیوان محاسبات حساباتی تدقیقه مکلف اولدینی دواړنک مرکز معاملات حسابیه سی هر دائره ده بولنان حساب مأمورندن وولایات حسابی ده او نظارتک محللرنده کی تأدیه مأمورلرندن آلور.

المانیاده سنه مالیه نیسان ابتداسنده باشلارومارت نهایتده ختام بولور. آنجق ایرتسی سنه مالیه نک مایس یکر میسنه دکین لوا وقضا مرکز لرنده و حزرانک یکر میسنه قدرده مرکز وزنه عمومیسنده سنه سابقه تحصیلات و تأدیاته دوام و معاملات سنه سابقه دفاترینه قید اولنور. مرکز حسابنک بر آی صکره قیادلمسی طسره معاملاتنک مرکز حسابیه توحیدی ایچوندور. حزران یکر میسنه قدر مرکز دفاتری قیامدادینی جهتله تحصیلات و تأدیاته دوام ایدیلور. (دیوان محاسباته وریله جنک اولان حسابلر بومدتلر طرفنده جریان ایدن معاملتیده محتوی بولنور. بو حسابات بودجهیه متناظرأ فصل وماده و تاریخ اعتباریله متسلسل اولوب سالف الذکر هر قضاده بولنان هر نظارتک تأدیه مأموری طرفندن بالتظیم اوراق مثبتیه سیله برابر « اشبو اوراق مثبتیه نک نوع وماهیتی دیوانک تبلیغات سابقه سیله معیندر » دیوانه کوندریلور. ویر نسخه سی ده لوایه ارسال ایدیلور. لواده بولنان تأدیه مأموری دخی مرکز لوا قضاسنک حسابی عینی شکلده دیوانه کوندردیکی کی بالعموم ملحق قضالرینک حسابی ده فصل وماده ویکون

اعتباریه اجمال و کندی حسابی ده اولوجهله علاوه ایدرک کذا دیوانه کونددر و بر نسخه سی ده نظارت عاذه سنه ارسال ایدر. نظارت عاذه سی لوالردن کلان حسابری جمع و تلفیق و مرکز حسابی ده فصل و ماده یکونی اعتباریه علاوه ایدرک تنظیم ایتدیکی خلاصه حسابیه بی مالیه نظارتیه کونددر. مالیه نظارتی دخی هر نظارتک لوا یکونی اوزرینه و بودجهیه متناظر اوله رق فصل و ماده اعتباریه الدینی بو حسابلردن تدقیقات اجرا ایتکسزین حساب قطعی عمومی بی بالترتیب طبع ایتدیره رک حسابک عاذه اولدینی سنه بی ولی ایدن سنه نک تشرین اولی ایچنده نظارتلردن آالدینی خلاصه حسابیه لاله برلکده دیوانه ارسال ایدر. و رایخشتاغه ایسه یالکز طبع ایتدیردیکی حسابی ویرر.

رایخشتاغ بو حسابی ایلک دفعه او قور و تدقیق ایدلک اوزره الی یدی کشیدن مرکب بر قومیسون بالتشکیل اکا حواله ایدر. قومیسون مضبطه سنده قوانین مالیه نک و بودجه نک فوقه چیقلدیغندن طولانی حسابک بو نقطه نریخی بعدالتدقیق آیری آیری برائت قراری ویرلمک شرطیه صرفیات عمومیه نک قبولی تکلیف اولتور و مضبطه مذکوره طبع و توزیع اولتور. بونک اوزرینه ایکنجی دفعه مذاکره جریان ایدر و دیوان محاسباتک ویره جکی مطالعه نامهیه انتظار اولتور. دیوانک مطالعه نامه سی کلنجه حساب اوچنچی دفعه قرائت اوله رق نقاط معلقه دن طولانی باش وکیله برر برر برائت قراری ویریلور انجق بعضاً اشبو فضله صرفیات حقنده برائت ویرلمز و بومالیک استردادینه چالشیلور. فقط اکثریتله موفقیت حاصل اولماز. حکومت بونلری آوانس صورتیه دائماً آتی به تعلیق ایدر. باش وکیل پارلامتونک مناسب بر زماننده برائت قرارینی استیصال ایدر انجق یالکز رایخشتاغک بر مصرفی قبولیه ایش بیتمز. بوندسراتک ده قبولی لازمدر. حتی بعض مواد حقنده رایخشتاغ برائت قراری ویردیکی حالده

بوندسرات ردایتش اولدیغندن قانون اساسی احکامیجه رایخشتاغک
قراری کآن لم یکون حکمنده قالیر .

دیوان محاسبات دخی قضالردن ونظارت محاسبه مأمورلردن کلدیکی
بالاده ذکر اولنان حسابلری ایجاب ایدن اوراق مثبتسیله تطبیق ایتدکدن
صکره قضا حسابلرینی لواحسابیله ولوا حسابلرینی مالیه دن کلدیکی بالاده
ذکر اولنان خلاصه حسابلر ایله واشبو خلاصه حسابلر ده مطبوع
حساب قطعی ایله بالتطبیق نتیجه ده حاصل اولان مطالعاتی آروجه یازارق
لاجل الطبع مالیه نظارتیه ارسال و اوراجه حساب قطعی دیوان
محاسباتک مطالعاتیله برلکده اولمق اوزره تکرار طبع ایدیلوب
پارلامنتویه تقدیم ایدیلورکه اشته بالاده عرض اولنان اوچنچی قرائت
آندنصکره اولور . انجق پارلامنتو مالیه نظارتندن کلان مطبوع حساب
قطعی یی کوزدن کچیره رک بیان مطالعه ایدلمسنی امر ایتدکجه دیوان محاسبات
مطالعات مخصوصه سیله برلکده حساب قطعی یی تکرار طبع ایتدیروب
تقدیم ایتدیکندن ناشی الیوم ۱۹۰۶ سنه سی حساب قطعی سی مطالعه نامه سیله
طبع اولمش و آندن صکره کی سنه لر حساباتی پیدرپی تدقیق ایدلمش
ایسه ده مطالعاتی یازلما مشدر .

دیوان محاسباته کوندریله جک حساباتک ارسالی ایچون معاد معین
اولیوب فقط دیوان محاسبات هر سنه یه عاقد اولان حساباتک تدقیقانه او
سنه نك انقضاسندن صکره کلان تشرین اول ابتدا سندن اول ابتدار
ایتمدیکی جهتله حسابک تنظیمی وارسالی حقنده بروجه آتی معامله جریان
ایدر . هر وزنه حسابی قیاتدقندن صکره اوراق مثبتسنی دیوانه نه وقت
ارسال ایده جکی حقنده دیوانک امر و اشعارینه منتظر اولور . چونکه
بالعموم وزنه لردن عینی زمانده اوراق مثبته جلب ایدلسه دیوان بالطبع
هیسنی بردن تدقیق ایدمه جکندن اوراق تراکم ایتش اولور . اشبو
اوراق مثبته دیوانجه بعدالتدقیق محالرینه اعاده اولور . اوراق مثبتنك

محاسبه کلنجه : المانیاده قانون تجاری ایله قانون مدنی به نظر آ بشفه بشفه مرور زمان مدتلی اولدیغندن اوراق بو اعتبار ایله تصنیف ایدیلور و اوزرلرینه شو قدر زماندن صکره احما ایدیله بیلور دیه اشارت اولنور . او مدت کلنجه اشبو اوراق یاصاتیلور و یا خودجکومتک کاغذ فابریقه سندله خیر حالته قونیلور .

مدت معینه سندله حساب ویره میان مأمورلرک وجودنی تصور ایده میورلر . یالکز مستملکات حساباتی تأخر ایدر دیورلر . بومأمورلر حقه اداره تعیین ایدیله جک جزای نقدی تأدییه ایدلر ایسه معاشرینه مراجعت اولنور . انفصال و یا وفات ایدن مأمورلرک حساباتی هیئت قتشیه حضورنده تدقیق و اوراق مثبت سیله تطبیق وقاصه موجودی تعداد ایدیلرک بلا نقصان خلفه دور اولمق قواعد نظامیه اقتضاسندن بولمغله مأمور سابقک علاقہ سی قالماش اوله جغندن حسابی خلنی طرفندن تنظیم اولنور .

« مواد شتی »

المانیا ایمپراطورلنی بودجه سی بوجه آتی ترتیب و تنظیم اولنور . مشترک نظارتلر و مستملکات برر لایحه ترتیب ایدرک مالیه نظارتنه کوندر در . مالیه ناظری واردات دولتک ناظری اولمق اعتبار ایله اسباب توازی تأمین ایتک ایچون علاقہ دار اولان ناظرلر ایله بالائتلاف کنندی دائره سی مصارفی ده علاوه ایدرک بودجه بی احضار و رایخشتاغه تقدیم ایدر .

عموم بودجه نک فصل نومرولری مسلسلدر و هر سنه دکشدر برلما مکده در . انجق یکیدن بر فصلک علاوه سی لازم کلد کده عین فصل نومروسنک مختلف حروفاتی اچلمقده در . بالفرض دولت بودجه سنک ۵۸ نجی فصلی دنیلنجه

هانکی نظارتك هانکی نوع مصرفی اولدینی بیلنور. مستملکات بودجه‌لرنده محرر اولان معاشات و مصارفات فصللرینك نومرولری بودجه‌ك دیکر قسمنده کی فصل نومرولرینه متناظر در . مثلاً المانیا ایمپراطورلنی بودجه‌سنی تشکیل ایدن ۸۷ فصلك ۱۲ نیجیسی هانکی نوع مصرف ایسه مستملکات بودجه‌لرنده کی اونوع مصرف‌ده مذکور نومرو تحتنده اولوق اوزره کوستریلور .

ایمپراطورلق بودجه‌سنك وارداتنه کلنجه: بونلر كمرک و پوسته تلغراف وارداتندن و ایمپراطورلق مطبعه‌سی ایله « رایش بانق » تمتعاندن و ایمپراطورلقجه اداره ایدیلان شمندوقرلر حاصلاتندن واتحاده داخل اولان حکومتلر اها لیسندن رسوم محلله‌دن ماعداحق استیفاسی ایمپراطورلقه عائد اوله‌رق طرح اولسان بمض ویرکیلردن عبارتدر « كمرک » ، توتون ، سیغاره ، شکر ، طوز ، مشروبات کئولیه، سرکه حاصل ایدن حامضات، شامپانیه‌لر ، کبریت ، اویون کاغدی، پیرا و تخمیر ویرکوسی، امره محرر سندات و تمغا بوللری، عومیتنه تمغا رسومی، وراثت ویرکوسی و ایستانستیق ویرکوسیله سائره . واردات مذکوره مصارف مشترکه‌ك تسویه‌سنه کفایت ایتدیکی تقدیرده بقیه‌سی حصص معینه ایله قپادیلور .

بودجه‌ك بر فصلندن دیکر فصلنه مناقله اجرایی قطعاً جائز دکلدر. مواد اره‌سنده مناقله‌یه کلنجه : رایخشتاغ مجلسی بعض مواددن دیکر بعض مواد مناقله اجرایی اساساً تجویز ایدر و بنابرین بوقیلل مواد آرهنده نظر مناقله‌یه صلاحیتدار در .

تخصیصاتك عدم کفایه‌سی تقدیرنده نظر ایکی صورته حرکت ایدر . اولاً اشبو عدم کفایت تأدییه‌سی قانوناً معین اولان مصارفك ترایدندن و اسعارك ترفندن ناشی ایسه مالیه نظارتنه بیلدیرمه حاجت یوقدر . « مثلاً وفات ایدن مأمورین عائله‌سنه مصارف ثقلیه و خرج‌جرا ویرلك لازمدر . حالبوکه بودجه‌یه قونیلان مبالغ بر حساب وسطی ایله تخمین

ایدل دیکندن و بو قیل مصارفک تأدیه سی قانوناً مجبوری اولدیغندن ناشی بونلر ایچون مالیه و پارلامنتویه مراجعت لازم دکلدر. کذلک برامورک و قاتندن صکره اوچ آی عائله سنه تام معاش تسویه اولنق لازمدر. بعض احوالده مأمور متوفانک رینه درحال مأمور تعین اولماز ایسه ده آجیق براقیله میه جق مأموریتلرده واردر. بوکی رلر ایچون برطرفدن یکی مأموره معاش ویرمک، برطرفندن ده مأمور متوفانک عائله سنه معاش اعطا ایتمک یعنی برایش ایچون ایکی مصرف ایتمک لازم کلور. اشبو مصارف علی الاکثر ایام خالیه تصرفاتی ایله قبانور ایسه ده قانوناً بتون بومکرر معاشاتک آریجه کوسترلمی ایجاب ایدر. معاشات کرک پروسیده کرک بتون ایمپراطورلقده هراوج آی ابتداسنده بروجه پشین تأدیه ایدیلور. ایشته بوصورتله مأمورینک وفاتی تقدیرنده بیله مواسات معاشی قسماً ویا کاملاً ویرلمش اولور. شاید برامورک عزلی ویا تحت محاکمه یه النمی ایجاب ایدر سه حقنده یاییله جق ایلك معامله نصف معاشنک استردادیدر. آنجق بعض مأمورین بوپاره یی رد ایتمکدن امتناع ایدرک ایشی محکمه تمیزه سوق ایتمکده حتی بعض دفعه حکومت محکوم اوله رق مصارف محاکمه یی ده تأدیه یه مجبور اولمقده در. ایشته اشبو اسباب موجبیه بناء مشاور موسیو فون لایب «اگر سرده معاشاتی بروجه پشین تأدیه ایتمک حقنده بر اصول وضع ایدر سه کز استرداد ایشنک بلا حکم اجرایی حقنده قیود قانونیه وضع ایدیکز» توصیه سنده بولمشددر. ثانیاً اشبو احوال خارجنده اولان و هیچ برسیبه مستند اولمایان فضلّه صرفیات ایچون مالیه نظارتنه مراجعت ایدر. مالیه نظارتی ایضاحات طلب ایتدکن صکره یاقبول ایدر ویا ایتمز. عدم قبولی حالنده مصرف اختیار اولته من. پروسیه مالیه ناظرینک سائر نظاره قارشو بوکی مسائلده موقی ایمپراطورلق مالیه ناظرینک موقعتدن دهسا قوتلیدر. چونکه ایمپراطورلقده مسئول یالکز باش وکیلدر. وایمپراطورلق مالیه ناظری بوقوتی باش وکیلدن

آلور. ایمپراطورلقده دخی مسئول برمالیه ناظری تعیین ایدملك ایسته نلش
ایسه ده بوفکر قبول ایدلامشدر . سنه‌سی ظرفده استعمال ایدلمان
تخصیصاتدن بعضیلرینك آیدیه کی سنه لره نقلی جائردر ، انجق نقلی جائز
اولان بوکی قره دیلر قانون مخصوص ایله تعیین اولنور .

مالیه نظارتی نظارتلره فصول ومواده محسوباً تحقق ایدن احتیاجه
کوره تخصیصاته محسوباً ناظرلرک تأدیه امریله پاره ویرر .

نظار رایخشتاغدن الدقلری تخصیصاتی مرکز وطشریه ایستدکلری
کی توزیع وتقسیمه وایجابنده تعدیله صلاحیتداردرلر . طشرده بولان
تأدیه مأمورلری ده کرک دیوان محاسباته وکرک مافوقه کوندره جکلری
بالاده ذکر اولان حسابی تنظیم ایدر ایکن بودجه ده مخصص اولوب
ناظر طرفدن کندوسنه صرفی ایچون مآذونیت ویریلان مقداری وتأدیه
ایتدیکی مبالغی وتأدیاتنك مآذون اولدینی مقداره نظراً فضله‌سی ویا تقصاتی
کوسترر . اشبوتأدیه مأمورلری وارداتی ده تحصیل ایدرلر و وارداتك مصرفدن
فضله‌سی مرکز حسابنه محلی رایشر بانق شعبه‌سنه تسلیم ایدرلر . مع هذا
بعضاً شمندوفر ایله ده نقد نقل اولندیغی واقعدر .

قضا ولوا مرکزلی ایله نظارتلردن دیوانه کن حسابلرک وزنه
معاملاتی احتوا ایتدیکی کورلدی . لدی السؤال: دیوان محاسبات وارداتی
تدقیق ایتدیکی کی بودجه خارجنده قالان وامانت قیلندن اولان معاملاتی
دخی تدقیقه مکلف اولدیغندن ووزنه معامله‌سنك حساب قطعی ایله جهت
تعلق دخی بولمیدیغندن حساباتده وزنه معامله‌سنك کوسترلسنه لزوم
اولمیدیغی بیان اولمشدر . مع هذا مفتشله معرفیه وزنه موجودلری آیده
برکرکه تعداد اولنه رق مقبوضات ومدفوعاتی وقاصه موجودی اجمالاً
واوچ آیده برکرکه ینه وزنه لر تعداد وتفتیش ایدیلرک فصول ومواد
اوزینه تفصیلاً یا پیلان حساب نتیجه‌سی مافوقی اولان وزنه یه بیلدیرملکه
برابر تفتیشك اجرایی کونی کیفیت تفتیش قاصه دفتینه شرح ویریلرک

امضا اولنور. کرک اشبورزنه تفتیشاتی کرک واردات حقنده اقدجه بیان ایدیلان قونطورولک تأمین حسن جریان ایچون لزوم کوررسه دیوان مأمورلرندن بعضیسی محللرینه کوندره رک تحقیقات اجرا ایتدیرر. مثلاً الیوم مستملکاته هر سنه بوقیل مفتشلر کوندرلنکده وبوسایه ده برچوق سوء استعمالاتک اوکی التقدده در.

آمر اعطالر ناظرلر ومستقل اداره مدیرلریدر. طشره لرده هر شعبه اداره نک ال بیوک مأموری نظارنی نامنه واروو ویلو قوماندانلری کذلک حربیه وبجریه ناظرلری نامنه آمر اعطادرلر. آمر اعطالر معینده کی محاسبلرایله وزنه دارلر «هر دأره نک حتی رایخشتاغ بیله بروزنه سی واردر» بودجه نک اداره سندن مسئول اولیوب یالکز واسطه تأدیهدرلر. انجق معاشات مقتنه بی آی نهایتلرنده هیچ بر طرفدن امر اعطا ایدیلدیکی حالده طوغریدن طوغری به اصحاب استحقاقه ویرلر.

وزنه لر بعضاً مربوط اولدقلری اداره دن بشقه بر شعبه اداره حسابنه دخی تأدیاده بولورلر. بو حالده اوایشدن طولای اوشعه اداره آمر اعطاسنک امری دأره سنده حرکت مجبوردرلر مثلاً لایز یقده بولسان محکمه تمیزک معاشات ومصارفاتی محل مذکورده کی پوسته وزنه سی طرفدن تأدیهد اولندیغندن بوتادیادن طولای بالطبع محکمه تمیز رئیسک امری تحتنده حرکت مجبوردر. کذلک کیه لده کی قتال مصارفی ده محل مذکورده کی پوسته وزنه سی بوسورنده تسویه ایدر.

المانیاده رایخشتاغه قارشو یکانه مسئول امپراطورلق باش وکیلدر. بناءً علیه بودجه یه متعلق مسائلدن ناشی رایخشتاغ طرفدن وقوعبولان استیضاحاته باش وکیل طرفدن جواب ویریلور وحساب قطعیدن طولای بالاده عرض ایدلدیکی وجهله باش وکیل تبریه ایدیلور. اشته ناظر مسئول ومحاسب مسئول اولندیغندن طولای ذات وزمان حسابی وحساب قطعی ناملریله ایکی حساب تنظیمنه لزوم ومحل کوریه میهرک بالاده تفصیلاً

عرض ایدلیدیکی وجهله یالکز بر حساب ترتیب وتنظیم ایدلمکده در .
نظارتلره مربوط مستقل اداره لر حساباتی طوغریدن طوغری به
دیوانه کوندرلر . و دیوانده ایجابنده بو اداره لر ایله مخبره ایدر .

بزم زراعت بانکه‌سی و امنیت صندوقی طرزنده مؤسسه بوراده یوقدر .
رایش بانق دنیلان ایمپراطورلق بانکه‌سینک « ۱۸۰ » ملیون مارق
سرمایه‌لی بر آنونیم شرکتیدر حکومتک بوشرکته ویردیکی امتیازاندن
اک مهمی بانقنوط اخراجیدر . بنابرین حکومت بانکه‌نک یارم ملیاردن
فضله چیقاردیغی بانقنوطلردن ویرکو آلور . مدیری حکومتجه تعیین ایدیلور ،
مأموریندن وعلی الاکثر مشاوریندندر . بانکه‌نک سنوی ۳۴ ملیون مارق
قدر اولان تمتعات صافیه‌سی بودجه‌نک واردات قسمنه داخلدر . بواعتبار
ایله برماهیت رسمیه‌ی ده اکتساب ایتیش اولیور « حسابات داخلیه‌سنه
دیوانک حق مداخله‌سی و تدقیقه صلاحیتی یوقدر . مع مافیه‌شهرده شعباتی
اولان زراعت بانکه‌سی کی مؤسسات حسابلرینک نه صورتله النسی مناسب
اوله‌جنی حقنده کی مطالعه‌سی مشاور خاص موسیوفون لاییدن صورلدقده
بوکی مؤسسه‌لرک شعبات حسابلرینک اداره مرکزیه لرجه تدقیق و تلفیق
ایدیلرک اوصورتله دیوانه ویرلمسی مناسب اوله‌جنی مطالعه‌سی سرد
ایدلمشدر .

انشاآتک ممکن مرتبه برسنه ظرفنده ختامه ایردیرلمسی و حساباتک
دیوانجه طوبدن کورلمسی تدقیق وقونترول خصوصنده مضبوطیتی موجب
اوله‌جنی و بویله یاپلیه‌رق انشاآت حسابی جسته جسته و آیری آیری
کوریله‌جک اولور ایسه مقاولاتک عقدنده تصرف رعایت اولنوب اولغندیغی
ومنافع دولتک لایقوله کوزه دیلوب کوزه دلمدیکی کی جهتلرک بحق تدقیق
ممکن اوله‌میه‌جنی سویلنمشدر .

امانه وقوعبولان انشاآت ایچون ویریلان مبالغ « اوستریاده اولدیغی
کی » طوغریدن طوغری به ماده‌سنه مصرف قید ایدیلرک حساب متوسط

استعمال اولغاز . شاید قومیسون ویا مأمور مخصوص ویریلان مبالغی تماماً صرف ایتماش ایسه متباقیتی استرداد قید اولنور . ویریلان پاره نقصان کلیر ایسه یکیدن مصرف قیدیله اکیال وایمام اولنور .

حکومه عائد فابریقه لر حقنده کی استیضاحه جواباً بوقیلدن اوله رق اداره ایدیلان و باشلیجه استقراض داخلی تحویلاتی باصان ایمراطورلق مطبعه سی مثال کوستریله رک ایضاح کیفیت اولنشد . خلاصه افاده لرینه کوره اشبو مطبعه بدایت تأسیسده اشخاص حسابنه بر صورت نفیسه ده پک چوق ایشلره کیریشمش ایسه ده سائر مطبعه لر ایله تأمین رقابت ایده مدیکندن بر طاقم ضررلره گرفتار اولدینی کورلش و بونک بر مؤسسه تجاریه کی اداره سنه قرار ویریلره ک او بولده بر قاعده حسابیه و دفاتر اتحاد اولنشد . شو صورتله که بوسایه ده مطبعه نک حکومته بار اولوب اولدینی و حال مالیه سی ثابت چابوق بر صورتده کورینور و هر سنه مطبعه اداره سی بر پلانچو نشر ایدر .

دوائر حکومتیه طبع ایتدیریله ک اولان اوراق ایچون مقتضی مواد ابتداییه مطبعه جه مبالغه اولنوب بوکا اجرت طبعیه دخی علاوه ایدیلره ک حاصلی سپارشی ویرن دائرهدن النور و مطبعه حسابنه ایراد قید اولنور . انجق اشبو حساب بر صورت موشکافانه ده یا بنغاز ، چونکه مطبعه نک کاری ده حکومته عائددر . خارجه یعنی افراد حسابنه یا ییله جق ایشلرک مواد ابتدائیه سیله اجرت طبعیه سی و تمتی مطبعه نک عائد اولدینی دستکاهلرنجه بالحساب حاصلی مشترییه بیلدیریلور و او صورتله سپارش النور .

حریبه و بحریه نظارتنده بولنان مهمات فابریقه لرینک معاشات و مصار فاتی حریبه بودجه سنده بر فصل مخصوص اوله رق مرقم اولوب مبالغه اولنان مواد ابتداییه بو فصله مصرف یازیلور . شو قدرکه بوندن حکومتک کاری و ضرری تعین ایده مدیکندن ایمراطورلق مطبعه سی حقنده تطبیق ایدیلان اصول حسابیه نک آتیا بونلر حقنده دخی تطبیق

ایسته بلمکده در . حتی بحریه فابریقه لرنده يك چوق سؤ استعمالات وقوع بولدینی و دولتك کار و ضررینی اکلامق مجبوری حس اولندیجی جهته امپراطورلق مطبعه سنده تطبیق ایدلمکده بولنان اصول حسابیه نك بوراجه دخی تطبیق کیفیتی دوشونولمکده در.

عینیات محاسبیری حساباتی و معاملات نقدیه

اشبو حسابات صورت منتظمه ده ارسال ایدلمکده ایسه ده هنوز بولنر دیوانجه تدقیق اولنمامکده در. چونکه بحق تدقیقات اجراسی اکثریا بمحاملرنجه تفتیشاته متوقف اولدیغندن و بو خصوصده مقتضی خرج راهی بارلامتو دریغ ایتدیکنن دیوان دخی بالطبع بو وظیفه یی ایضا ایدم مامکده در . مع هذا اشبو عینیات حساباتی اداره تدقیقات و تفتیشاته تابع طو بلمکده در . اشیای غیر منقوله دفتری دیوانجه طو بلمکده در و اشیای مذکور نك بیع شراسی نتایجی ده قید اولنمکده در .

معاملات نقدیه یه کئنجه : هر تأدیه مأموری قاصه سنده احتیاجاتندن فضله اولان مبانی محلی بانق شعبه سته تودیع ایدر و بو صورتله وقوع بولان تودیعات مقداری هر کون بانق اداره مرکزیه سندن علی الامجال مالیه نظارننه بیلدیریلور . شو قدرکه بر محله بولنان موجودك مقداری نظارت مذکور هجه اکلا شلمق ارزو ایدلکده بانقده دن سؤال اولنور .

دیون عمومیه و مستقرضات

پروسیه دیون عمومیه اداره مستقلسی - که اخیراً هیئت اتحادیه نك

تشکلندن صکره المانیانک دیون عمومی و وظائفی دخی درعهده ایتشدرد -
 طوغریدن طوغری به باش ویکله مربوطدر . بواداره نك باش ویکلدن ماعدا
 آمری اوله رق بر قومیسون واردر که بوقومیسون آلتیسی « بوندسرات »
 و آلتیسی « رایخشتاغ » اعضا سندن اولمق وبری دیوان محاسبات رئیس
 بولمق اوزره اون اوچ کشیدن مرکدر . بومجلسک ریاستی دیوان رئیسنه
 محول اولوب پارلامنتر اوله رق اجتماع ایتدیکی وقت مذکور اون ایکی
 اعضا میانده بر رئیس انتخاب اولنور . بومجلسک برده رئیس نانسی واردر .
 دیون عمومی اداره سی مأمورینی ایکی صورتله تحلیف ایدیلور لر . اولاً هر
 مأمور کی ، ثانیاً رایخشتاغ طرفدن ویریلان مأذونیت خارجنده اوراق
 نقدیه اخراج ایچون حکومت طرفدن وقوعبوله جق تکلیفاتی رد
 ایده جکلرینه دائردر .

ایشو اداره اولاً یوز یکر می ملیون مارق تجاوز ایتمک اوزره اوراق
 نقدیه « فیاتی اون مارق تجاوز ایتمان و مجبوری التداول اولان قاصه قائمه سی »
 اخراجی ، ثانیاً استقراض داخلی تحویلاتنک طبع و اعمالی وقائض ورأس -
 الماللرینک تأدیه سی و بونلرک حساباتنک هر آی تنظیمیله بالاده ذکر اولنان
 قومسیونه اعطاسی ثالثاً قوائم نقدیه نك واستقراض تحویلاتی حسابلرینک
 ترتیبی و هر سنه نهایتده اوراق مثبت سیله برابر برنسخه نك دیوان محاسباته
 و دیگر برنسخه نك ده رایخشتاغه تقدیمی و برائت قراری استحصالی
 وظیفه لری ایله مکلفدر . دیون عمومی قومسیوننده بوندسراتدن بولنه جق
 اعضانک بری دائماً مالیه ناظری اولدینی ایچون بوحسابک برعینی طرفندن
 النور و مالیه جه یاییله جق حساب قطعی به علاوه سی بوضورتله تأمین ایدیلور .
 هر بر استقراضک آیری حساب قطعیسی تنظیم ایدلر ، آنجق هر
 سنه حسابنده او استقراضک سیتواسیونی کوستریلور .

کرك قوائم نقدیه نك و كرك استقراض تحویلاتنک قارشولفی یوقدر .
 فرانسه دن النان تضمینات حربیه دن حفظ ایدلمکده بولنلمش اولان

۱۳۰ میلیون ماركك اخراجی تحت مآذونینده اولان قاصه اوراق نقدیه‌سنك
 بمقدارینه موافق اولسی خلقه بر قارشولق اولدینی ذهابی ویرمشدیر .
 استقراض تحویلاتی دائماً باش ایله ساتیلمقدهدر . بوتحویلات طوبدن
 پیاسیه چیقارلیوب لزوم کورلدکجه رایش بانک معرفتیه پیاسهده صائلق
 اوزره باش وکیل طرفندن وقوعبولان طلب اوزرینه دیون عمومی
 اداآردسندن ویرلمکدهدر . احاطیاتلرك دوشکون زماننده پیاسه‌دن اشترا
 صورتیه وینه‌بانق معرفتیه وقوعبولمقدهدر . اجراسی تقرر ایدن استقراض
 تحویلاتی مبیاعه ایدن کیسه‌لردن پك چوقلری تحویلاتك ضیاعدن
 ورقایه‌سی ضمنتده دیون عمومی اداره‌سنة و دیعه صورتیه برافقدهدرلر .
 تحویلاتك اصلی بشقه ورقهده مطبوعدر . اون سنه‌لك فائضی حاوی
 قوبونلرده آیریمجه مطبوع اولدیغندن اصحاب تحویل تحویلاتك اصلنی
 حکومتك دیون عمومی اداره‌سنة تودیع وفائض قوبونلری نژنده حفظ
 ایتیکله وقت وزمانیه وفائضی الهرق استفاده‌دن محروم اولیور . بو
 صورتله تودیع ایدیلان تحویلات مقداری کیندکجه تراید ایدرك بر درجه‌ی
 بولش که تودیع اولنان تحویلاتك مصارف طبعیه‌سی قزانق جهتی
 دوشونیلرك شویله بر اوصول اتخاذ اولنمشدر . حکومت مثلاً ۱۰۰
 میلیون مارقلق بر استقراض عقد ایدمچکی زمان بونك یوزده نه‌مقدارینك
 ایقه تودیعی صورتیه اوله‌جنی رایخشتاغ طرفندن تعیین اولنور و تحویلاتی
 نژنده صاقلامق ارزوسنده بولنمیان کیسه‌لر مبیاعه ایدمچکلری تحویلاته
 مقابل ویره‌جکلر مبانق دیون عمومی اداره‌سنة تودیع ایدرلر . مبالغ
 مذکوره دیون دفتری نامیه بو ایش ایچون اتخاذ ایدیلن دفتر صاحبك
 اسمی و تفصیلات لازمه‌سیله قید اولنور . بر تحویلك نه وجهله استعمالی
 قابل ایسه مبالغ مودوعه‌نكده اوصورتله استعمالی تأمین ایدمك اوزره
 دیون دفتربه مشروحات اجرا ایدمکدهدر . بوصورتله مثلاً قرق میلیون
 مارق تودیعات اولور ایسه دیون عمومی اداره‌سی او استقراض ایچون

التمش ملیون مارقلق تحویلات طبع ایستدیرمکه حکومت بونده ایکی صورتله استفاده ایدر . بریسی قرق ملیون مارقلق تحویلاتک مصارف طبعیه سنی تصرف ، ایتک دیکری پیاسه یه آز تحویل چیقارمقدیر . پیاسه یه چیقان مذکور التمش ملیون مارقلق تحویلاتدن اصحابی طرفندن بومنوال اوزره تودیع ایدنلر اولور . ایسه تحویلاتک اصللرینک پیاسه یه اخراجیله قیدینه مخصوص اولان دفتره اشارت اولنه رق آیری برقاصده حفظ و بالاده ذکر کی کچن قومسیونک نظر تدقیق و تفتیشندن کچدکدنصکره احراق اولور . برده یوقاروده بحث اولندینی اوزره صاحب تحویل تحویلی ضایع ایستدیک کی زمان متضرر اولماق نقطه سی تأمل ایدیلهرک تحویلاتک اصلی برورقه ده واون سنه لک فائض قوپونلری دیکر ورقه ده اولق اوزره طبع اولور . کرک تحویلاتک اصلی کرک قوپونلری آیری آیری دفترله یازیلور . بودفترلرده تحویلاتک قیمتی ، تاریخ طبعی و نومروسی وچین طبعنده حاضر بولان مفتشلرک امضاسی کوستریلور . قوپونلره عائد اولان دفترده کذلک تحویلاتک نومروسی و مفتشلرک امضاسی و تاریخ طبعی بولور . کرک قاصه قائمه سی و کرک تحویلات و قوپونلری دیون اداره سنک نظارتی آلتنده اولق اوزره حکومت مطبعه سنده طبع اولور . تحویلات اصلاری ایله فائض قوپونلری موقع تداوله چیقاریله جنی زمان دیون عمومیه اداره سنده کی صغوق تمغا ایله تمغانور ، ایشته بوتمغا اورولمدقه برتحویل هیچ برقیمتی حائر دکلدیر . بوراده محتاج ایضاح بر نقطه قالیورکه اوده استقراض عقد اولنه جنی زمان تفصیلاتی یوقاروده کچن صورته دیون عمومیه اداره سنه پاره ویره جک کیسه لرک نرهدن معلومات المقده اولملری ماده سیدر . حکومت بومسئله ایچون بری مفصل و دیکری مختصر اولق اوزره « المانیا ایمپراطورلنی دیون دفتری حقنده رسمی حوادث موقوته » نامیله ایکی رساله نشر ایدر . بونده شرائط لازمه یی شرح و ایضاح ایدر . حکومتک پارلامنتودن استقراض ایچون مساعده الیغنی و بورساله لری

اوقویه‌رق خلق بالطبع خبر آلیر و دیون عمومیه اداره‌سنه مراجعت ایدر .
 بو وجهله دیون دفترینه مبالغ و فیره قید اولنور . تحویلاتك موقع تداوله
 چیقارلق اوزره باش وکالت واسطه‌سیله رایش بانکه کوندریله جکی زمان
 ایکنجی بردفتره یازیلور که بو دفترده تحویلاتك قیمتی ونومروسی
 و تحویلاتده امضاسی بولان ذواتك امضالری کوستریلور . اشته بو یولده
 عقد اولنان استقراضات حاصلیری مالیه نظارتنه تسلیم ایدیلور . طبع
 اولنوبده موقع تداوله چیقاریلان تحویلات تفصیلات مسرووده‌دن کلاشیله‌جنی
 وجهله بو اداره‌ده خصوصی قاصه‌لرده بولندیگی جهتله بونلر بالاده مذکور
 قومسیون طرفندن آیده برکرة تعداد و سنه‌ده اوچ دفعه اجراسی معتاد
 اولان تفتیشدن ماعدا لاعلی‌التعین زمانلرده تفتیش اولنور . حتی یکی
 بر استقراض تحویله مبادله اولنق اوزره بانکهلردن و اصحابی طرفندن تودیع
 اولنان اسکی استقراض تحویلاتی مبادله معامله‌سنگ ایفاسندن صکره مذکور
 قومسیون طرفندن معاینه و تدقیق ایدیلور و آندن صکره احراق اولنور .
 استقراضاتك فائض و رأس‌المال تأدیاتی ایچون هر سنه بودجه‌سنه برر
 مقدار مبلغ وضع ایدلدیکی جهتله او مقدار پاره‌ینی یا مالیه‌دن یا خود اراشه
 ایده‌جکی بر بانکدن دیون عمومیه اداره‌سی آلور . وفائض تأدیاتی
 بوجه‌آتی اجرا و دفاتر عائدیه‌سنه قید ایدیلور . بو تأدیات ایکی صورته
 وقوع بولمقده‌در . بریسی کندی قاصه‌سندن هر کون مراجعت ایدن کیمسه‌لره
 قوپون مقابلی پاره ویرلمکله اولور ، و برکونده نه قدر قوپون تراکم ایدرسه
 بر بوردرویه قید ایدیلوب یکونتی یومیه دفترینه و استقراضاته مخصوص
 پارتی دفترینه قید ایدر . ایکنجی صورت تأدیه ایسه بانکهلرجه وقوع
 بولور ، بوضورتله هر هانکی بانکه تأدیه ایتدیکي قوپونلری استقراضك
 جنسی اعتباریله آیری آیری بوردرولره یازهرق پاکت پاکت دیون عمومیه
 اداره‌سنه کوندرر . بونلر معددلر طرفندن صاییلوب برنجی قوپونه امضا
 و ایکنجی درجه‌ده قونطرول ایدلمش اولنق اوزره مفتش طرفندن تعداد

اولنور . فقط بوقونطورول لاعلی التعین پا کتیر اوزرنده اجرا ایدیلهرک شو معامله اوپاکتی تعداد ایدن معددک حضورنده ایضا اولنور، انی متعاقب یومیه وبارتی دفترلینه یکون اوزرینه قید اولنور . بالطبع تأدییهی اجرا ایدن بانکه ایله دیون عمومیه اداره سنک حساب جاریسی اولدیغندن اکاده قید اولنور .

دیوان محاسباته ویریهلجک حساب قطعی ده بر سنه ظرفنده کی تأدیاتی انواع استقراضاتی آیری آیری کوسترک صورتیه دیون عمومیه نک بقیه یکونی کوستریلور . انجق بر استقراضک عقدندن ختامنه قدر نه مقدار تأدیات اجرا ایدلیکنی کوستر برطرزده دفترطوئنامقده در . بونی ایضاح ایچون مثلاً ۱۸۹۰ سنه سنده عقداولان استقراضک فئض ورأس الماللرینه ۱۹۱۰ سنه سنه قدر نه مقدار تأدیات اجرا ایدلیکنی بولمقی ایچون ۱۸۹۱ سنه سندن ۱۹۰۹ سنه سی نهایتنه قدر اولان سنه لر حساباته مراجعتله طویلامق لازمدر .

فائض قوبونلرینک حین طبعنده و تحویلات اصللرینک پیاسهیه اخراجنده مفردات وجهله برر دفتره قید اولمنه مقابل تأدییه اولان قوبونلرک صورت مختصرده قید ایدلمی ویاخود حین اخراجنده متخذ دفترمحتویاتنک تأدییه سنده قید و اشارت اولمنه مساعد برطرزده طوئنامسی شایان دقت کوریهلهرک صورلدقده شویولده جواب الندی . قوبونلر حاملنه عائددر وسنه عائدنه سنک انقضاسندن اعتباراً درت سنه مرورنده بدلی تأدییه ایدلمز بناء علیه تأدیاته مخصوص بر مفردات دفتری طوئتمق دولته هیچ فائده تأمین ایتمز . اهالییه کلنجه قوبونلری ضایع ایتدکری زمان دیون عمومیه اداره سنه یدلرنده کی تحویلات اصللرینی ابراز ایدرک مراجعت ایدرلر ایسه تحویلات اصللرینک قیدینه مخصوص اولان دفتره شرح ویرلدیکی کبی تأدییه مآذون اولان بانکه لرده معلومات ویریهلهرک اوقوبون ابراز ایدیلنجه در حال مصادره اولنور . بو نقطه ده بو وجهله تأمین

ایدلمشدر. بوندن بشقه فضله تقید اشتغالات زانده‌نی موجب کورلندیکنندن توسل ایدلماشدر. قوپونلرک اوزرلرنده حامللرینک اوقوپونلردن استفاده ایده‌جککاری حقوقی متضمن بعض عبارتله « حاملنه عاندر ، شوقدر زمان مرورندن صکره بدلی تأدیه ایدلر کی » بولنور . بوندن بشقه قوپونلرک یرکوشه‌سی حین تأدیه‌ده دیگر کوشه‌سیده اثنای تعدادده کسیله‌رک بونلرک برجانجی مثلث بر شکل المقده‌در . بو قوپونلر تعداد محتویاتی یکوناً دفاتر عانده‌سینه قید اولندقدن صکره طوربه‌لره وضع ایدیلهرک معدد طرفندن قورشون مهر ایله مهرلنور . اوراق مثبته اولهرق اولجه ذکر اولنان بوردرولر دیوانه کوندریلور . دیوان محاسبات حسابجی تدقیق ایتدکن وبارلامتو دولتک حساب عمومیسنی قبول ایتدکن صکره بوقوپونلر مذکور قومسیون مواجهه‌سنده احراق اولنور. « حکومتک مرور زمانه اوغرایان قوپونلر محتویاتندن سنوی ۶۰,۰۰۰ مارق راده‌سنده فائده کوردیکی بالحساب اکلالمشدر . »

رأس المال تأدیاتی ایسه: پیاسه‌یه چیقاریلان تحویلات هر نه وقت اخراج فیئاتندن بر مقدار تنزل ایدرسه در حال مبیاعه صورتیله وقوعبولور . بو طرزده وقوعبولان مبیاعه ایله تحویلاتدن بر مقداری احیا ومتباقی قسمی‌ده استقراض ایچون تعیین ایدیلان مدت نهایتده تحویلاتک حاوی اولدینی مبلغ یا نقداً ویاخود دیگر استقراض تحویلاتی چیقاریله‌رق مبادله‌ آسویه اولنور. تحویلاتک اصلی ایچون مرور زمان یوقدر فقط استقراضک حین عقدنده مدت وشرائط تعیین ایدلمش ایسه او مدته تابع اولهرق حکمدن ساقط اولورا کر مدت تعیین اولنماش ایسه قواعد عمومی‌یه تبعیتله استقراضک ختامندن ویاخود تحویلاتک قرعه‌سی کشیده‌سیله اموریتسه ایدلدیکی تاریخندن اعتباراً اوتوز سنه‌در .

دیون عمومی‌یه اداره‌سنه عانده اولق اوزره « قرالی تحویلات تفتیشی ایچون معامله امرنامه‌سی » و « قرالی احای دیون قاصه‌سی اصول معامله

امرنامه‌سی « وبالاده ذکر اولنان » المان ایمپراطورلنی دیون دفتری حقنده رسمی حوادث موقوته - مفصل ومختصر اوله‌رق « اوچ قطعه تعلیاتنامه » ۷، ۶، ۵ « نومرولر ایله تقدیم ایدلمشدر .

۱۹۱۰ سنه‌سی تشرین ثانیه‌سی ظایه‌سنده ایمپراطورلق دیون دفترنده

۹۰۰، ۹۸۸، ۹۸۴ مارق وپروسیه دیون دفترنده ۲۵۰، ۳۳۹، ۶۰۳، ۲

مارق مقید اولدینی کورلمشدر .

پروسیه دیوان محاسباتی کرک وظیفه وکرک تشکیلات اساسیه اعتباریه ایمپراطورلق دیوان محاسباتک عینی اولدیغندن وحتی بالاده عرض ایدلدیکی وجهله ایمپراطورلغک انشای تشکلنده دیوان محاسبات حقنده بر قانون مخصوص تنظیم ایدلمیه‌رک ۱۸۱۷ سنه‌سنده تأسیس ایدلمش اولان پروسیه دیوان محاسباتی قاتوننه توفیقاً ایفای وظیفه ایتدیکندن اوراجه تدقیقاته لزوم اولمدینی مشاور موسیوفون لایب طرفندن افاده اولنمشدر .



بروکسلده اجرا ایدیلان تدقیقات تایمینی مین راپور

--(بیچ) دیوان محاسباتک تاریخچه‌سی (بیچ)--

بلجیقا دیوان محاسباتی پک اسکی بر مؤسسه‌در . لکن وظائفی وصلاحیتی بر طاقم تبدلاته اوغرامشدر که بوده مؤسسات سیاسیه‌نک مقاصدنده وپرنسیپلرنده اجرا اولنان تحولاتک نتیجه‌سیدر .

بورغونیا دوقه‌سی جسور فیلیپ Philippe Hardi ۱۳۸۵ سنه‌سی کانون تانیسنک اون بشی تاریخلی امر نامه ایله فلاندر ایچون ایکی مجلس Chambre تأسیس ایتمشدی . بونلردن بری امور عدلیه‌یی رؤیت وتمشیه دیکریده واردات وصرفیات ایله مکلف اولان ضابطانک حسن

ایفای وظیفه ایدوب ایتمک‌لرینی تفتیشه مأمور ایدی . بوفلاندر محاسبات مجلسنک *Chambre des comptes* اساسی اولمشدر . بعده بر محاسبات مجلسی ده برابانت ایچون تأسیس اولمشدر .

بلچیقانک فرانسه‌یه الحاقندن اول - ۱۷۹۴ ده - حکومته عائد اولان بالچلجه واردات مالیه مجلسنده *Conseil des Finances* تدقیق ایدیلور ایدی . پالکز والی *gouverneur général* اموال حکومتی اداره حقنی حائر ایدی . محاسبات مجلسنک وظائفی تحصیلدارلرک *Receveurs* و اموال دولنده وضع یدایدن سائر ضابطان عمومیه‌نک *Officiers publics* حسابلرینی تدقیق ایتمکدن وقیامقندن عبارت ایدی .

فرانسه‌نک زمان اشغالنده ۴ تموز سنه ۱۷۹۰ تاریخی قانون ایله بو مملکت ایچون لغو ایدلمس اولان اسکی محاسبات مجلسی یرینه اصول محاسبیه تعلق ایدن امور ایچون اصول محاسبه ملیه قومیسوئلری *Commission de comptabilité nationale* قائم اولمشدر .

۱۶ ایلول ۱۸۰۷ قانونی بو حالی قالدیره رق فرانسه وممالک مفتوحه [بنابرین بلچیق] ایچون پالکز بر دیوان محاسبات تأسیس ایتمشدر که بو دیوان حساباتدن بشقه برشی حقنده اعلام ویره مزدی آمر اعطالراوزرینه حق قضاسی یوق ایدی .

فلمنک حکومتی ائناسنده *Loi fondamentale* قانون اصلینک ۲۰۳ نجی ماده‌سی موجبجه تکمیل قرایت ایچون بر مجلس عمومی محاسبات *Chambre générale des comptes* اوله‌جق ایدی که وظیفه‌سی اداره عمومیه شعباتنک وبالعموم دولت محاسبلرینک حسابات سنویه‌لرینی تدقیق و تصفیه‌دن عبارت ایدی . ۲۱ حزران ۱۸۲۰ تاریخی تشکیلات قانونی بوهیئته تأسیسنه مخصوص وظائف عادیه ویرمشدر .

بو قانون اوزمانه قدر محدود اولان دیوانک اقتدارینی بر آز دها توسیع ایتمش یعنی حکومت مصارفنک تأدیاتی تدقیق وظیفه‌سیله مکلف

طوئشدرکه بوسایه ده بودجده محرر اولان تخصیصاتک تجاوز ایدلمامسی و ماوضع لهنک غیری به صرف ایدلمامسی تأمین ایدلمشدر لکن قرالک بلا حدود تأدیات موقته وآوانس امر ایتسی اقتداری محافظه اولنمشدر . بو قانون احکامنک قسم اعظمی آئیده بحث ایده جکمز ۳۰ کانون اول ۱۸۳۰ تاریخی قانونه کچمش ایسه ده مؤسسات سیاسیه ده حصوله کتیریلان تبدلاتک ایجاب ایتدیکی تعدیلاته اوغرامشدر . فی الحقیقه قانون اصلی Loi fondamentale زماننده قرالی امور مالیه نک اداره مستقلسنی حائزایدی . نظارک مسؤولیتی یوقدی حکومتک حساباتی قوه تشریعیه نک مذاکره وتصدیقه تابع طوئزدی مجلس محاسباتک قونطرولی رئیس حکومتک نظارت مستقلسنی آلتده اجرا اولنمقده ایدی مع هذا ۲۴ تشرین اول سنه ۱۸۳۶ تاریخی براراده ایله تصدیق وتصوب ایدلمش و اداره مالیه به متعلق بولنش اولان بر نظامنامه ایله بوقونترول کوچلتلمش وعادتا حکمسز براقلمشدر بو نظامنامه نک حکمی اصول محاسبه دولت Comptabilité général de l'état حقنده کی ۱۵ مایس ۱۸۴۶ تاریخی قانونک تشرینه دکیں بلجیقاده جاری اولمشدر . بلجیقا ملی قونفره سی Congrès national Belge بواساسلری بالتعدیل اداره مالیه بی مملکتک منافعه دهاموافق قواعد استناد اتیدیرمشلردر بوقواعد مسؤولیت نظار، قوه تشریعیه نک تصدیق واعلانیدر . مجلس محاسباتک وظائفی یکی اساسات سیاسیه به مناسب بر صورتده تنسیق اولنمشدر . بو مؤسسه نک عنوانی ده اوزمان [دیوان محاسبات] ه قلب ایدلمشدر .

۲۳ کانون اول ۱۸۳۰ ملی قونفره قومیسونی راپورنده شویله محرردر . « دیوان محاسبات اسمی بزه مجلس محاسبات اسمندن دهاموافق کورلشدر . زیرا بو هیئت محاکم هیئی کی محاسبلر حقنده لازم الاجرا اعلاملر ویررلر ، حتی بعض احوالده جزای نقدی به حکم ایلر . معلومکزددرکه اسامی معاسز برشی دکلدردر . وبوصورتبه تسمیه مؤسسه بی

انظار عامه ده یو کس لتمک جهته خدمت ایدم چکی اشکاردر» بلچیکا استقلالیتنی تأمین ایدن ۱۸۳۰ اختلالنک ابتداسنده ملی قونفره یکی حکومتنک اداره مالیه سنک تأسیسیله اشتغال ایتدی ۳۰ کانون اول سنه ۱۸۳۰ ده ایکی کون مناقشه دن صکره یکی دیوان محاسباتی تأسیس ایدن قانونی قبول ایتدی و دیوان محاسبات اوسنه کانون نایسنک اون بشنده تأسس ایتدی. آنجق ۷ شباط سنه ۱۸۳۱ ده تصدیق ایدیله بیان بلچیکا قانون اساسیسی ۱۲۶ نجی ماده سنده یکی قانونده محرر اولدینی اوزره دیوانک باشلیجه وظائفی تکرار و تذکار ایتش و ۱۱۰ نجی ماده سنه قدر امور مالیه حقنده بوندن باشقه پک مهم دها بعض اساسلر وضع ایلشدر برقاج سنه تجربه دن صوکره دیوان محاسبات مجلس ملی به ویردیکی سنوی راپورلرده قانونده کی بعض نقصانلری عرض و اخطار ایتشدر ۳۱ اغستوس ۱۸۳۹ ده ۱۸۳۰ سنه سی قانون موقتنک تعدیلی ضمتنده برلایحه قانونیه امضا ایتک ایچون بر قومیسون تشکیل اولمشدر ۱۹ کانون ثانی ۱۸۴۴ ده مجلس مبعوثانه تقدیم ایدیلان بولایحه انجق ۱۸۴۶ مذاکرده قبول ایدلمشدر .

یکی قانون دیوانی صورت قطعیده تنسیق و وظائفی، اداره عمومیه لر ایله اولان مناسباتی دها زیاده وضوح ایله تعیین ایلشدر (۲۹ تشرین اول سنه ۱۸۴۶ قانونی) بوتاریخدن برقاج آی اول ، یعنی ۱۵ مایس ۱۸۴۶ ده اصول محاسبه عمومیه حقنده بر قانون لایحه سی قبول و تصدیق ایدلمش ایدی که بونده اموال عمومیه نك صورت اداره سنه دائر اولان قواعدك هیئت عمومیه سی و محاسبلرك و آمر اعطالرك وظائفی و معاملاتك انباتی ایچون نه کبی اصولاره رعایت ایتک لازم کلدیکی ارااه اولمش ایدی. اوزماندن بری دیوان محاسباتك تشکیلاتی تعدیلاته اوغرامشدر . یالکز ۹ مارت ۱۸۶۳ تاریخی بر قانون دیوان اعضاسنک معاشلری تزیید ایتش ۱۵ کانون ثانی ۱۸۷۷ تاریخی بر امرنامه قرالی دیوان محاسباته تودیع ایدلمش و ایدیله جك اولان اوراقك امحا ایدیله چکی مدتی تعیین ایله مشدر .

وضعیتی

دیوان محاسبات مستقل بر دأر در . قوه تشریعیه ایله اولان مناسبتی اولاً : رئیس و اعضاسیله کابینک عزل و نصبی مجلس مبعوثانجه اجرا ایدلمسندن؛ ثانیاً : هر سنه دولتک حساب عمومی قطعیسی حقنده بالتظیم طبع ایتدیردیکی مطالعاتی طوغریدن طوغرییه و بلاواسطه مجلس مبعوثانه تقدیم ایتمکدن عبارتدر بوندن بشقه دیوان محاسبات هر سنه کندی معاشات و مصارفاتی حساباتی اوراق مثبته ایله برلکده مجلس مبعوثانه اعطایه مجبوردر که اشبو حسابی حساب عمومی دولتک تقدیمی صره سنده اعطا ایدر قوه اجرائیه ایله مناسبتی اعطا امرلرینک ویزه سندن و عموم محاسبلرک حساباتی و حساب عمومی دولتک تطبیقندن عبارت اولوب ناظر والیدر ایله و حساباته متعلق ایشلرندن طولانی محاسبلر ایله مخبرهیه مآذوندر .

دیوان محاسباتک موقع تشریفاتیسی « ۱۸۰۷ » تاریخنده فرانسزلرک تحت اشغالنده ایکن وضع ایدیلان و فقط حکمی الآن جاری اولان برقانون اینجاچه « محکمه تمیزه معادلدر ، و مراسمده محکمه تمیزی بلا فاصله تعقیب ایدر . آنجق محکمه تمیز هیئتیه دیوان رسمی البسه سنده اوافق برفرق وارددر ، شویله که محکمه تمیز هیئت قرضی جبه اکتسا ایتدکاری حالده دیوان محاسبات رئیس عینی یجمده و فقط سیاه قدیفه و اعضاسی سیاه ستن و باش کابی سیاه ایپک جبه کیمنکده در .

تشکیلاتی

دیوان محاسبات بررئیس والی اعضا و برباشکابیدن مرکبدر و هر آلتی سنهده براتخابلری تجدید ایدنک اوزره مجلس مبعوثان طرفندن نصب اولنورلر رئیس و اعضانک الی ، اوتوز یاشنده و باش کابینک اقلی یکریمی

بش یاشنده اولملری لازمدر . باش کاتبك رأی یوقدر دیوان محاسباتده
واعضاتك اك كنجی مدعی عموميك وظیفه‌سی ایفایدر دیوان محاسبات
ایکی قسمه منقسمدر . بوقسملردن هر برنده اوچر اعضا بولنور برنجی
قسم بالعموم حساباتك تدقیق وظیفه‌سیله مکلفدر اشبو حسابات بوقسمك
راپوری اوزرینه هیئت عمومیده مذاکره واعلامه ربط اولنور .
ایککنجی قسمك وظیفه‌سی دیون عمومیه دفتر کیرینك برنسخه‌سی طوتمقدن
وتقاعد معاشاتی قیوداتی تسجیلدن واعطا امرلرینی ویزه‌دن عبارتدر دیوان
محاسباتك بالاده عرض اولنان هیئتندن ماعدا اولان مأمورلرینك قادروسی
ومعاشاتی بوجه آتیدر :

سنوی مقدار		معاشات		اسامی مأموریت	عدد
اصغری	وسطی	اعظمی	درجات		
۷۰۰۰	۷۲۵۰	۷۵۰۰	۱	مدیر	۴
۵۵۰۰	۶۰۰۰	۶۵۰۰	۲	شعبه مدیری	۸
۴۴۰۰	۴۷۰۰	۵۰۰۰	۳	قلم مدیری	۱۰
۳۴۰۰	۳۷۰۰	۴۰۰۰	۴	نمیز	۱۰
۲۶۰۰	۲۹۰۰	۳۲۰۰	۵	برنجی صنف مدقق	۴۰
۲۰۰۰	۲۲۰۰	۲۴۰۰		« «	
۱۴۰۰	۱۶۰۰	۱۸۰۰		« «	

سنوی مقدار معاشات

سنوی مقدار		اسامی مأموریت	عدد
اصغری	وسطی	اعظمی	
۳۸۰۰	۴۱۵۰	۴۵۰۰	۱۲
۳۲۰۰	۳۴۰۰	۳۶۰۰	
۲۶۰۰	۲۸۰۰	۳۰۰۰	
۲۰۰۰	۲۲۰۰	۲۴۰۰	
۱۴۰۰	۱۶۰۰	۱۸۰۰	

قواصلر و او طه جیلر

۱	{ ۲۵۰۰ ۱۸۰۰	۲۰۰۰ ۱۳۰۰	باش قواصلر و قواصلر پوسته جی	۱۳
۲	۱۳۰۰	۱۰۰۰	قالور یفر آتشیجیری	۴
۳	۱۰۰۰	۶۰۰	قبوجی	۱

دیوانك تشكیلات قانونی اقتضاسیجه رئیسك معاشی سنوی ۹۰۰۰ و اعضا ایله باشكاتبك معاشی ۷۰۰۰ فرائق اولق اوزره تقرر ایتیش ایدی آنجق ۹ مارت سنه ۱۸۶۳ تاریخی قانون ایله اعضاكان معاشی ۸۵۰۰ فرانغه ابلاغ ایدلمشدر ۳۱ كانون اول ۱۹۰۰ قانونی ایجابجه اشبو معاشاته هر بش سنه خدمت نهایتنده ۳۰۰ فرائق ضمی تقرر ایتیش واشبو قانون اخیر ایجابجه رئیسك معاشی ۱۲۵۰۰ فرائق اوله رق تعیین ایدلمشدر ایوم رئیس بولنان موسیو بورژو و امدت خدمته كوره ۱۴۳۰۰ فرائق المتقدمه در [دیوان محاسباتك تشكیلات قانونی ، نظامنامه داخلی ، اصول محاسبه قانونی و بعض نظامات و مقررات مالیه مجموعه سی نمونه نومرو ۱ عدد ۳

وظائفی

دیوان محاسبات حساب عمومی دولتك و بالعموم عادی و فوق العاده محاسبلك [فوق العاده محاسب امانت صورتیه انشاآت حسابی طومغه مأمور اولانلاردر] و آزان دوتره زورلك و آلائی و طابورلر كاتبلریك و الحاصل اچقیه وضع ید ایدن بالعموم مأمورلر حسابلری تدیق و تصفیة سی وظیفه سیله مكلفدر بوندن باشقه بودجه ده محرر مخصصاتك تجاوز ایتدیرلما می و بر ماده دن دیگر ماده یه مناقبه اجرا ایدلما می خصوصلرینه نظارت ایدر . مختلف اداره لك حسابلری حقنده اعلام ویرر و بونك ایچون هر درلو اوراق و وظائفی جلب ایدر . كرك دولتك كرك ولایاتك

واردات و مصارقاته متعلق ایضاحات و معلومات و حساباتی طلب ایده بیلور. بودجه موادینك تجاوز و مواد بیتنده مناقله اجرا ایدلماسنی تأمین ایچون قبل‌الصرف ویزه اجراسیله مکلفدر ویزه معامله‌سنك صور اجرا‌یسه‌سی و تطبیقاتی بوجه آتی عرض اولنور. اعطا امرلری نظارتلرجه تنظیم و ناظر طرفندن یاخود ناظر نامه مأذون اولان بر ذات طرفندن امضا ایدیلهرك برتذ کره یه لفا و بوردروسیله معاً دیوانه کوندریلور. بو بوردرو نسختین در بوردرولرك اوزرنده مربوط اولدینی تذکره‌نك تاریخ و نومروسی محرردر. اعطا امری بردانه دخی اولسه ینه بوردرو وارددر. بوندن باشقه اعطا امرینه حسابك ماهیتنی مشعر اوراق مثبته دخی ربط اولنور بو صورتله دیوانه کان تذکره [بو تذکره مطبوع اولوب ظهرنده کی ستونلرده ملفوفی اولان بوردرولرك عددی و برده حاوی اولدینی اعطا امرلرینك عددی و برده بالئی ازانۀ اولنور] اوراق قلمنجه کشاد اولنان دفتر مخصوصه Indicateur général قید اولنور. و کافه‌سی بر قیاق درونته Chemise وضع ایله [اشبو قیاقلر تفریقه موجوب سهولت اولمق اوزره هر نظارت ایچون آیری رنکده در] نومروسی یازیلان بعده تصنیف قلمنه Bureau de dépouillement کلیر. بوراده فیش Fiche تعیمیر اولنان مستطیل الشکل قارتونلره املا اولنور. بو فیشلر اصحاب استحقاقك اسامیسنه کوره حروف هجاء ترتیبیله تصنیف و مخصوص دولابره وضع اولنمشدر. بونلر مقدما هر سنه تبدیل اولنورکن شمعی بوندن واز کیلهرك صاحب استحقاق نامه تنظیم ایدیلان فیش بر قاچ سنه لر استعمال ایلمکده در. چونکه بعضاً بر استحقاق ایچون فیشه بر سنه ده یالکیز بر قلم یازلدینی جهته بك چوق بوش بر قالدینی و ایرتسی سنه احتمال عین آدم ایچون ینه بر فیش تنظیم ایتك لازم کلدیکی تجربه ایله اکلانشلدیقندن بو اصول اختیار اولنمشدر. فیشلر تصنیف قلمنده قانوب اعطا آمرلری مربوطاتیه برلکده تدقیق قلمنه Vérification تودیع اولنور بوراده

اوراق مثبتہ مندرہ جاتندہ کی عملیات حسابیہ نك جملہ سی تدقیق اولندیگی کی بودجه ماده سنہ موافقی وبالعموم قوانین موجودہ مالیہ یہ مطابقتی جہتلی تعقیق اولتور . بعدہ قونطورول Contrôle ہیئتہ ویریلور . بو ہیئت دیوانك اوچ اعضاسندن مرکب اولوب هر بری ہیئت نامنه تصدیق اولنان اعطا امرلرینی امضا ایتکده در .

شوصورتله ویزه ایدلش اولان اعطا امرندہ کی امضانك موثوقیتی دیوان باشکابی دخی تصدیق ایدر بعدہ دفاتر لازمه سنہ قید اولنق اوزره قلم مخصوصنه Imputation کیدر . اتخاذا اولنان دفترلر نمونه سنده کوریلہ جکی وجهله بودجه موادی اوزرینه مرتب وخصصاتی دخی مشعردر . نسختین اولہرق کلان بوردرولردن بری اوراق مثبتہ سیلہ برابر بالادہ کی بقای ایچندہ تذکرہ سیلہ برلکده دیوان محاسبانده حفظ اولہرق دیگر نسخہ سی اعطا امریلہ برابر مالیہ نظارتندہ معاملات نقدیہ مدیرینہ Trésorerie ارسال اولتور . معاملات نقدیہ قلمی بونی دفتر مخصوصنه [نمونہ : نومبر عدد ۹] قید ایتدکن صکرہ اعطا امرینك محل مخصوصنه دفترك صحیفہ نومروسی وتاریخ قیدی اشارت ایدرک مبلغ مزبورك تأدیہ ایدیلہ جکی محالردہ معاملات نقدیہ مدیرینہ اخبار واعطا امرینی عائد اولدینی نظارتہ تسیار وبوردروی حفظ ایدر . [محل معاملات نقدیہ مأموری بواخباری دفتر مخصوصنه قید ایدر] نظارت عائدہ سی دخی اعطا امرینی تعهدلی مکتوب ایله اصحاب استحقاقه کوندیرر . صاحب استحقاق اعطالرینی حاملہ محل تأدیہ ده کی معاملات نقدیہ مأمورینہ مراجعت واعطا امرینہ Vue bon à payer یازدیردقن صکرہ تاریخ وضعی ایله امضا ایتدیرر و [بواننادہ بالادہ عرض اولنان «V» اشارتی یازیلور . بانقہ یہ مراجعت ایدرک پارہ یی آلور واعطا امرینك محل مخصوصنی امضالار . مقبوضات ایچون تمغا رسمی اولدیغندن بالطبع پول الصاق ایدلش هر آی ظرفندہ بانقہ بوصورتله تأمین ایتدیکی اعطا امرلرینك آی نہایتندہ

برجدولنی تنظیم ایدرک محلنده معاملات نقدیه مدیرینه کوندیرر اوده دفتر مخصوصنده کی قیدینه « Payé - تأدیه اولمشدر » معناسنی اشراپ ایدن « P » اشارتی وضع ایتدکن صکره بر آی ظرفنده سنین مختلفیه عائد اوله رق تأدیه ایدیلان اعطا امرلرینی [اعطا امرلری دوره حسابیه اسمنی ویرن سنه نك كانون ثانسی ایتداسندن اعتباراً بش سنه ظرفنده تأدیه اولنه بیلیر . وحين تأدیه سنده عائد اولدینی سنه حسابنه کچیریلور . سنه اوزرینه آیری آیری بوردر وایله برابر هر آی مالیه نظارتنه کوندیرر مالیه نظارتنده کی معاملات نقدیه مدیریده ولایاتده کی معاملات نقدیه مدیرلرینک اسملرینی عمودی و بودجه موادینی افقی اوزره هر سنه یه عائد اولوب تأدیه اولمان اعطا امرلرینه آیری آیری ایکیشر نسخه جدول تنظیم وشوقدرکه بونلردن برنده ماده یگونلرینی آیری آیری ودیکرنده توحید ایدرک ارأه ایدوب محللرندن کلان مفردات بوردر وایله معادیوان محاسباته ارسال ایدر . دیوان محاسباتجه اولا اعطا امرلری ولایات معاملات نقدیه مأمورلرینک تنظیم ایتدیکی مفردات بوردر وایله ثانیاً بو مفردات بوردر وایله یگونلری مالیه نظارتنده کی معاملات نقدیه مدیرینک یابدینی جدول ایله تطبیق ایدلمکله برابر اعطا امرنده محرر اولان مبالغ صاحب استحقاقک کندوسنه واکر وفات ایتمش ایسه وره سنه اعطا ایدیلوب ایدلمدیکنی تدقیق ایدر بعده ماده یگونلرینی طوبدن ارأه ایدن جدول ایله اعطا امرلرینی حفظ ایدر و ماده یگونلرینی آیری آیری کوسترن مفصل جدولک ظهرینه « دیوان محاسبات یگوننی شوقدره بالغ اوله رق تأدیه ایدلمش اولان امرلرینی اخذ ایتشدن » عباره سی یازیلوب مالیه نظارتنه اعاده اولنور . ایشته بو شرح معاملات نقدیه اداره عمومیه سنک برأته دلالت ایدر ایشته بوبرأت اداره عمومیه طرفندن دیگر آزانلره تبلیغ اولنور .

اعطا امرلرینک صورت ردینه کلنجه : عملیات حسابیه خطاسی

و ماده‌یه عدم موافقتی و مخصوصاتك عدم كفايتی و بالعموم قوانین مالییه به مغایرتی و الحاصل مصارفك غیر قانونی illégalité اولمیسیدر . صورت رد شو یولده اولور . تدقیقه ایلک مأمور اولان کیمسه اسباب ردنی مبین بر راپور تنظیم و امضا ایدر . و قلم مدیرینه ویریر مدیر مطالعه‌سی و ارسه آریجه یازهرق و یوق ایسه ساده‌جه امضایله‌رق راپور قونظرول هیئته تودیع اولنور . راپور تور اعضاده مطالعه‌سی یازار . و یونک اوزرینه بر تذکره مسوده‌سی احضار اولنور . بومسوده هیئت عمومیه‌ده مذاکره ایدیلور . تقرر ایدن صورت دائره‌سنده یازیلان تذکره دیوان رئیس طرفندن امضا و باش کاتب طرفندن Contre signe ایدلدکن صکره نظارت عانده‌سه ارسال و Indicateur general ده یکی بر نومرو وضع اولنور . بروردرویه مربوط اولان اعطا امرلینک بر ویا بر قاجی رد ایدیلورسه بوردر و یکنندن بونلرک حاصلی تنزیل اولنور . وقاج اعطا امری قبول وقاجی رد اولندیغی قیاق اوزرینه اشارت اولنور .

رد ایدیلان اعطا امرلری اوزرینه نظارت عانده‌سی طرفندن تبدیل اولنان اعطا امرلینه اسکی اعطا امری نومروسی وضع واسکی تاریخ یازیلهرق اوزرینه ارسائی مشعر یکیدن یازیلان مکتوبک تاریخی‌ده اشارت اولنور . اعطا امرلری علی‌العموم قوچانسزدرد . آنجق لیکیداتور اولان دائره‌ده بر نسخه‌سی بولندیغی و نومرولرک بوصورته تسلسل ایتدیرلدیکنی لدی‌السؤال افاده ایتدیلر . دیوان محاسباتجه ویزه ایدلدکن صکره بعض احوالده ابطال اولنان اعطا امرلری مالیه نظارتی معرفتیه دیوان محاسباته کوندزلدیکی زمان بودجه‌یه متناظر اولهرق دیوان محاسباته متخذ اولان دفترده کی قیدی امضا اولنور . شویله که ابطال معامله‌سنگ دفتره قیدی کونی او ماده‌نک محرر بولندیغی صحیفه یکن ایدیلهرک و ابطال اولنان اعطا امرینک تاریخ و نومروسی ذکر اولنهرق تنزیل صورتیه تصحیح اولنور . دیوان محاسباته طوتیلان امپوتاسیون

دفترلرینک یکونلرینک صحتی قونطرول ایتک اوزره هر نظارت اوج آیده بر ماده یکونلرینی حاوی (اعطا امری مفرداتیله دکل) بردفتر تنظیم ایدرک دیوان محاسباته کوندریر

اعطا امرلرینه بالاده عرض اولندیغی اوزره مصارفک اوراق مثبتہ‌سی ربط اولمقدهدر . یعنی فاطوره لر مناقصه قائم‌لریله معاووله نامہ لک مصدق صورتلری تسلیم مضبط‌لری وانشآت هیئت فیه‌سی راپورلری اعطا امرلرینه ربطاً کوندرلمکدهدر اشبو صورتلر دیوان محاسباتده آیری دوسیہ لر ایچنده حفظ ایدلمک اوزره علی الاکثر اعطا امرلرندن آیری اوله رق کوندرلمکدهدر . شو صورتله که اشبو معاووله یه مستند بر اعطا امری کلنجه مأمور مخصوص دیوانده موجود اولان صورت ایله تطبیق ایدرک تدقیق کیفیت ایدر .

سائر نظارتلرجه اتخاذ ایدیلان اصوله کلنجه : بونلر آنجق بودجه ماده‌سی تصریح ایتک صورتیله کندیلرینه قره‌دی آچدیررلر، معاملات سائرہ‌سندہ بشقه فرق یوقدر . بوصورت بزده کی تحقیقات حواله‌سنه مشابه ایسده نظارک دها زیاده استقلال ایله بودجه‌لرینی اداره ایتلرینی موجب اولوب مخصوصاتک مرکز و طشره یه توزیعنه محل قالماقدهدر . قره‌دی کشادینه دائر اوله رق دیوان محاسباته اعطا امری کوندرلدیکی صرہ‌ده مالیه نظارتنده کیفیت برتذکره ایله اشعار و معاملات نقدیه مأمورلرندن هانکیسنک نه مقدار تأدیاتده بولنسی ارزو ایدلدیکی دخی دخی اخبار اولنور . دیوانجه و بزه ایدیلان قره‌دی مکتوبلریله ایجاب ایدن معاملات نقدیه مأمورلرینه تبایغ کیفیت ایدلدیکی مین مالیه نظارتی طرفندن آلان جواب اوزرینه مأمورین محلیه یه بیان حال اولنور . اشبو قره‌دی یه محسوباً مأمورین محلیه جه نظارت عائدہ‌سی طرفندن وقوع بولان تبلیغات دائرہ‌سندہ محلینده معاملات نقدیه اداره‌لرینه تأدیہ مکتوبلری Mandat de payment یازیلور و بوتادیہ مکتوبلرینه اوراق مثبتہ

ربط ایدل‌کدن و محلی معاملات نقدیه مأمور لرنجه ویزه اولتدقندن صکره
 بانقه شعبه لرنندن دیگر اعطا امر لری کی محتویاتی تأدیه اولتور. بوضورتله
 وقوع بولان تأدیاتک اوراق مثبته‌سی تأدیه مکتوبلریله برابر هر آی معاملات
 نقدیه مأموری طرفندن « بواوراقی بانقه شعبه‌سی بالاده بیسان ایدل‌دیکی
 وجهله ماه‌ماه معاملات نقدیه مأمورینه دورایش اوله جئندن » لیکیداتور
 اولان دوائر نسخین اوله‌رق تنظیم اولسان بوردر و ایله برابر ارسال
 ایدر. بونسخه لردن بریسی مصارفی بودجه موادی اوزرینه تنظیم ایده‌جک
 اولان دائره‌ده اوراق مثبته‌سیله برابر حفظ ایدیلور. دیگر نسخه‌سی
 اوراق مثبته‌نک ورود ایتدیکنی مین شرح ویریلوب امضا اوله‌رق بونی
 ارسال ایدن معاملات نقدیه مأمورینه اعاده اولتور. و اوده مالیه نظارتیه
 کوندر . دائره عائده‌سی بواوراق مثبته‌نی « الای و طابور و ادارات
 عسکریه‌نک طویدن آلدینی پاره‌لرک آوانس اولسی و اوراق مثبته‌نک الای
 حسابلرینک ورودنده دیوانجه کوریه‌جکی جهتله اوراق مثبته‌سی طلب
 مضبطه‌لریدر » بودجه موادی اوزرینه تصنیف ایدرک اوچ نسخه اوله‌رق
 نصیفه امر اعطاسی Oredonnance de régularitation ترتیب
 و بر بوردر و تنظیم ایدرل جمله‌سی دیوان محاسباته کوندر . اوراق مثبته
 ایله بوردر و اعطا امرینک بر نسخه‌سی دیوان محاسباته قایلر دیگر
 نسخه‌سی اوراق مثبته‌نک دیوان محاسباته ورودینی مین شرح ایله نظارت
 عائده‌سنه « یعنی اوراق مثبته‌نی کوندرن دائره‌یه » اعاده اولتورکه اونظارت
 ایچون برائت دیمکدر . اوچنجی نسخه‌سی دیوانک ویزه‌سی حاوی
 اوله‌رق مالیه‌ده کی معاملات نقدیه اداره‌سنه کوندریلور .

مابعدی وار

